

To'on yó'o kían mií noó ni taa San Pablo ni sa'an noó na ñoo Corinto

Ká'an Pablo ndisá'an

1 ¹ Yu'u kúú Pablo, na ni nakana Ndios kakuu iin apóstol Jesucristo, dá kane'i to'on na, táto'on k'i'o kóni mií Ndios. Ta yu'u xí'in ñani yo Sóstenes ² ká'an ndu ndisá'an xí'in ndo'ó, na kúú ñayuu Ndios ndéi ñoo Corinto, ndo'ó na ni nduvii Ndios sa'á ña ni kee Cristo Jesús, ta ni kana na ndo'ó ña kakuu ndó ñayuu mií ná, ta dión ta'ani ni kee na xí'in ñayuu ndéi ndidaá kúú xían, na nákonni ña sato'o na kúú Jesucristo, na kúú sato'o na xí'in sato'o yo. ³ Ta mií tatá yo Ndios xí'in sato'o yo Jesucristo ná kee ña maní xí'in ndó, ta naki'o na ña koo va'a ini ndo.

Náki'o Pablo ndivé'e sa'á ña ni xi'o oon Ndios noó ñayuu ñoo, dá ná kati'a na kechóon na noo ná

⁴ Ta daá kuití vá náki'o yu'u ndivé'e noo tatá yo Ndios sa'a ndo'ó, sa'a ndidaá kúú ña maní ña kían ni xi'o oon na noo ndo sa'a Cristo Jesús. ⁵ Dá chi ni kekuíká Ndios ndo'ó noo ndidaá ña'a sa'á ña ni kee Jesús, chi ni kekuíká ná ndo'ó xí'in to'on ká'an ndo, xí'in ña koo ndichí cháá ka ndo xí'in to'on na. ⁶ Ta ñoo kían ná'a ña miían ndaa ndíta ndaa ndo xí'in to'on va'a ni seídó'o ndó sa'a Cristo. ⁷ Sa'á ñoo ni iin tó'ón ña'a o kámani noo ndo, dá kati'a ndó kee ndó choon Ndios xían nani ndáti ndó kasandaá kuu na'a noo sato'o yo Jesucristo. ⁸ Ta mií tatá Ndios kúú na chindeé ndo'ó, dá kandita toon ndó xí'in ná nda noo ndí'i, dá kían ni iin tó'ón ta'on kuachi o kóo sata ndo tá ná kasandaá kuu nandió koo tuku Jesucristo, na kúú sato'o yo, kasaa na. ⁹ Iin na ndaa kúú Ndios, ta mií ná kúú na ni nakana ndo'ó ña kandita ndó xí'in de'e na Jesucristo, na kúú sato'o yo.

Ko vá'a ña tá'anda tá'an na kúú kuendá Jesús

¹⁰ Seí nda'avíi noo ndo'ó, ñani miíi, xí'in kuu sato'o yo Jesucristo ña iin tó'ón ná kakuu ña nákanini ini ndo, ta ná dá'a ni ka'anda tá'an ndó. Ñóchí kandeí ndó, iin tó'ón ná kakuu ñaxintóni ndo, ta iin tó'ón ná kakuu ña nákanini ini ndo. ¹¹ Chi ni katóni inii, ñanii, ni kee na ve'e Cloé, ña naá tá'an ndó noó ña kándisa ndó. ¹² Dión ká'in xí'in ndó, dá chi dao ndó kaá ña kúú ndó kuendá Pablo, ta dao ka ndo kaá ña kúú ndó kuendá Apolos, ta dao ka ndo kaá ña kúú ndó kuendá Cefas, ta dao ka ndo kaá ña kúú ndó kuendá Cristo. ¹³ ¿Á kua'a vá ni ta'anda Cristo, xiní ndo? ¿Á ni sarkaa Pablo ndika cruz, xiní ndo? O, ¿á xí'in kuu yu'u ni sodo ndúta ndo'ó, ká'an ndó? ¹⁴ Náki'oi ndivé'e noo Ndios chi ni iin tó'ón ndó ko ní dákodo ndúta yu'u, sava'a Crispo xí'in Gayo va kúú ra

ni dakódo ndúta yu'u. ¹⁵ Sa'á ñoó ni iin ñayuu o kúu kaa ña ni sodó ndúta ná xí'ín kuu yú'u. ¹⁶ Ta ni dakódo ndúta ta'anii na ve'e Estéfanos, tído ko ndúsaa inií á ió dao ka na ni dakódo ndútaí. ¹⁷ Dá chi ko ní sa'ándá Cristo choon nooí ña dakódo ndútaí ndo'ó, di'a ni xi'o na choon nooí ña dána'i to'on va'a na. Ta ko ndúkú ta'on yu'u to'on ndichí dáxino inií ndo'ó, chi ko kónii kenóoi ña ni kee Cristo tá ni xi'i na sa'a yo ndika cruz.

Jesucristo kúu ndée mií Ndios xí'ín ña ndichí mií ná

¹⁸ Dá chi to'on va'a ña ká'an sa'á ña ni xi'i Cristo ndika cruz kían diki noó na kua'an naá. Tído noo yóo, na ni'í ña káki, to'on yó'o kúu ndée mií Ndios ña dákaiki ñaá. ¹⁹ Dá chi di'a ká'an tuti ii Ndios:

Dánaá vai ña ndichí taa,
ta kañó'í ñaxintóni ñayuu kándaá ini.

²⁰ Sa'á ñoó, ¿ndi ndó'o na kómí ña ndichí viti, tá dáá? Ta, ¿ndi ndó'o na dákuá'a ña ndichí? Ta, ¿ndi ndó'o na ká'an to'on ndichí ió ñayuu yó'o? ¿Á ko ná'a ta'on ndó ña ni kenóo Ndios ña ndichí ió ñayuu yó'o?

²¹ Ta xí'ín ña ndichí kómí Ndios ni chikaa ini na ña o kásandaá ñayuu kana'á ná mií Ndios xí'ín ña ndichí ñayuu yó'o. Di'a ni nata'an ini mií Ndios dákaiki na ñayuu kándísa to'on dána'a ndu, va'ará to'on diki va kían noo dao ka ñayuu.

²² Ta na Israel kúu na xíka iin ña ndato, dá kandía na, ta na griego kúu na ndúkú to'on ndichí, dá kandía na. ²³ Tído ndu'u kúu na dána'a sa'a Cristo, na ni xi'i ndika cruz. Ta to'on yó'o kían dár'u'u na Israel, ta kían to'on diki noó na griego. ²⁴ Tído noo ñayuu ni nakana mií Ndios, á mií ná kúu ná na Israel, o á mií ná kúu ná na griego, Jesucristo kúu ndée mií Ndios xí'ín ña ndichí mií ná. ²⁵ Dá chi to'on Ndios, ña chínani ñayuu kúu to'on diki, ña ndichí cháá ka kían o duú ña ndichí kómí na ndéi ñayuu yó'o. Ta ña'a Ndios, ña ká'an ñayuu kúu ña vitá cháá ka, di'a ña'a ndakí cháá ka kían o duú ña ndakí noo ñayuu.

²⁶ Sa'á ñoó, kande'é ndó, ñani, chi tá ni nakana Ndios ndo'ó xoo mií ná, cháá vá ndó ni sa kuu ñayuu ndichí noo ñayuu ndéi ñayuu yó'o, ta cháá ta'ani ndó ni sa kuu ñayuu né'e choon, ta cháá ta'ani ndó ni sa kuu de'e na kuiká ndáya'i.

²⁷ Chi ni kaxi Ndios ñayuu xixi noo ñayuu ndéi ñayuu yó'o, dá kenóo na ñayuu kaá ndichí. Ta ni kaxi ta'ani na ñayuu ko ndakí noo ñayuu ndéi ñayuu yó'o, dá kenóo na ñayuu kaá ndakí. ²⁸ Ta ni kaxi ta'ani na ñayuu nóo xí'ín ñayuu ko ndáya'i noo ñayuu ndéi ñayuu yó'o, xí'ín na koó ña'a kúu, dá dátuu ná ña ndáya'i ñayuu yó'o. ²⁹ Ki'o dión ni kee Ndios, dá kían ni iin tó'on ñayuu ná o kúu chindaya'i mií noo ná.

³⁰ Ta mií Ndios kúu na ni xi'o ña ni nduu yó ñayuu Cristo Jesús, ta sa'á Cristo ni xi'o na ña ndichí noo yo, xí'ín ña kandoo vii yo noo ná, xí'ín ña koo vii yo, xí'ín ña káki yó tixi ndá'a kuachi yo. ³¹ Ki'o dión ni kee

Ndios, dá chí k̄i'o di'a va ká'an tuti ī ná: “Tá'an na ká'an kuryí, kánian kuryí ná sa'á ña ni kee sato'o yo Ndios sa'a ná.”

Dána'a Pablo sa'á ña ni xi'i Jesucristo ndika cruz sa'a yo

2 ¹ Sa'á ñoó, ñani, tá ni saai noo ndéi ndó ni daná'i to'on ni ni'í noo mií Ndios, ko ní kéchóoin to'on táyí o to'on ndichí. ² Chí ni chikaa ini dána'i noo ndo sava'a sa'a Jesucristo, xí'ín sa'á ña ni kee na sa'a yo ndika cruz. ³ Tá ni sa ioi xí'ín ndó, nda'í va ni sa ioi, ta ni sa ndei nino nda'oi ña yu'í. ⁴ Ta ko ní ndúkúí to'on luu, ña kána ñaxintóni taa ñayuú yó'o ka'in xí'ín ndó, dá xino ini ndo. Chí di'a ni na'a mií Espiritu ī Ndios ndée kómí ná tein ña ni daná'i noo ndo. ⁵ Dión dá kían ná dá'a ni kandeé iní ndo Jesús kee ña ndichí ió ñayuú yó'o, di'a kandeé iní ndo ná kee ndée Ndios.

Kómí yó Espiritu ī Ndios

⁶ Tído ndu'u kúú na ká'an to'on ndichí xí'ín na ndíta ni sisa xí'ín ña kándisa na, tído to'on ndichí yó'o, ko kían to'on ndichí kómí na kúú kuendá ñayuú yó'o, ta ko kían to'on ndichí dándaki taa né'e choon ñayuú yó'o, tá'an ra sa kua'an naá vá. ⁷ Tído ndu'u kúú na ká'an sa'a to'on ndichí, ña ná'a iin tó'ón mí Ndios, tá'an ña sa kaa de'é. Ta ña ndichí yó'o kían ña ni chikaa ini mií ná kee na tá ko ñá'a kava'a na ñayuú yó'o, dá ná kuu natiin yó ñañó'ó k̄i'o na noo yo. ⁸ Ta ni iin tó'ón taa né'e choon ñayuú yó'o ko ní xi'o kuendá sa'á ña ndichí yó'o, dá chí tá ni xi'o ra kuendá sa'an, dá kían o chírkaa ta'on ra sato'o yo Jesús, na kómí ndidaá ñañó'ó, ndika cruz, ní kúu. ⁹ Chí di'a ká'an tuti ī Ndios:

Tá'an ña'a ko ní xiní ñayuu xí'ín noo ná,
xí'ín ña ko ní seídó'o na,
xí'ín ña ni iin kuu ko ní nákaní ini níó ná sa'a,
ñoó kían ni kenduu Ndios k̄i'o na noó ñayuu kóni ñaá.

¹⁰ Tído ndidaá kúú ña yó'o kían ni na'a Ndios noo yo ni kee Espiritu ī mií ná. Chí Espiritu ná kúú na ndé'é va'a ndidaá kúú ña'a, va'ará nda maá ini níó Ndios kían.

¹¹ Ta, ¿ndá yoo kúú iin taa ná'a ndi nákaní ini iin ka taa? Sava'a iin tó'ón espíritu nákaa ini ra kían ná'a ndí kían nákaní ini ra. Ta dión ta'ani, ni iin tó'ón ta'on ñayuu ko ná'a ndi nákaní ini Ndios, sava'a iin tó'ón Espiritu mií vá ná ná'a ndí kían nákaní ini na. ¹² Ta yóó kúú na ko ní nátiin ta'on yó espíritu kómí na kúú kuendá ñayuú yó'o. Di'a ni natiin yó Espiritu ni kii noo mí Ndios, dá kuu kandaá ini yo ndí kían kúú ña va'a ni xi'o Ndios noo yo. ¹³ Ta sa'a ndidaá kúú ña'a yó'o ká'an ndu, tído ko ká'an ta'on ndu táto'on k̄i'o dána'a na kómí ña ndichí ñayuú yó'o. Di'a dána'a ndu xí'ín to'on ni daná'a Espiritu ī Ndios noo ndú, chí dána'a ndu to'on ni kii noo Espiritu Ndios noo na kómí Espiritu ná.

¹⁴ Ta ñayuu ko kómí Espíritu ií Ndios, o kúu ta'on natiin na ña dána'a Espíritu ií Ndios, dá chí ñiki va kíán noo ná. Ta o kúu ta'on katóni ini na ña. Dá chí sava'a na kómí Espíritu ií Ndios kúu na kuu kandaá ini sa'án. ¹⁵ Ta ñayuu kómí Espíritu Ndios kúu na keyíko va'a sa'a ndidaá ña'a, ta ko iin ta'on kuu keyíko sa'a ná. ¹⁶ Chí di'a kaá tuti ií Ndios: “¿Ndá yoo kandeé kana'á ndí kíán nákani ini sato'o yo Ndios? ¿Ndá yoo katí'a dána'a noo ná?” Tído yóo kúu na kómí ñaxintóni Cristo.

Kéchóon nduú Pablo xí'ín Apolos noo Ndios

3 ¹ Tído ko ní kúu ta'on dána'i noo ndo'ó, ñani, táto'on kí'o dána'i noo ñayuu kómí Espíritu ií Ndios. Di'a ni ñaná'i noo ndo táto'on kí'o dána'i noo ñayuu kée ña kóni ñíi ná, chí táto'on takuálí va kúu ndó noo to'on Cristo. ² Sa'á ñoo ni xi'oi lechí va ni xi'i ndó táto'on kí'o kée na xí'ín takuálí, dá chí o kúu keí xí ña seí na yatá. Ta kí'o dión ta'ani ndó'o ndo'ó, dá chí ko ní kúu ta'on natiin ndó ña ndichí cháa ka sa'a Ndios, ta nda viti o kúu ií va natiin ndóan. ³ Dá chí kée ií va ndó ña kóni ñíi ndo, dá chí ió ií va ña u'u ini ndo, ta naá tá'an ií va ndó, ta sa'ándá tá'an ií va ndó. ¿Á ko ná'a ta'on ndó ña ña yó'o ná'a ña kúu ndó ñayuu kée ña kóni ñíi, ta ná'a ta'anian ña kée ndó táto'on kée ñayuu ko ná'a Ndios? ⁴ Dá chí tá ká'an ndo ña kúu ndó kuendá Pablo, o ká'an ndo ña kúu ndó kuendá Apolos, ¿á ko ná'a ta'on ndó ña ña yó'o ná'a ña kúu ndó ñayuu kée ña kóni ñíi?

⁵ Ta, ¿ndí kíán kúu Pablo, ká'an ndó? Ta, ¿ndí kíán kúu Apolos, ká'an ndó? Chí sava'a na kéchóon noo Ndios oon va kúu ndu'u, ta ni ñaná'a ndu noo ndo, dá ni kandísa ndó. Chí iin rá iin ndu kée choon ni xi'o sato'o yo Ndios noo ndú. ⁶ Yu'u kúu ra ni ni'i choon ña chí'i tata, ta Apolos ni ni'i choon ña ko'oni naan. Tído mií va Ndios kúu na dákuá'anoan. ⁷ Sa'á ñoo ni ña'a ko kúu ta ni chí'i tata, ni ra ni so'onian, sava'a Ndios va kúu na ndáya'i, chí mií ná kúu na dákuá'anoan. ⁸ Iin nóo va ndáya'i ta ni chí'i tata, xí'ín ra ni so'onian, va'ará iin rá iin ra nátiin ya'i táto'on kí'o káa choon ni kee ra. ⁹ Chí ndu'u kúu ra kéchóon noo choon Ndios, ta ndo'ó kúu táto'on ño'ó xíti noo ná, ta kúu ta'ani ndó táto'on kí'o iin ve'e, ña nákaa na káva'a na.

¹⁰ Ta sa'á ña maní ni kee Ndios xí'ín, sa'á ñoo kúu táto'on iin na tí'a káva'a ve'e, chí ni chindú'í sa'án. Ta dao ka na kúu na dáxinoan. Sa'á ñoo kánian kandaá iin rá iin na choon kée na, dá kandoo va'an. ¹¹ Dá chí ko iin ka kuu chindu'u iin ka sa'a ve'e noo ña sa káandu'u, chí sa'a ve'e ñoo kúu mií Jesucristo. ¹² Ta sata sa'a ve'e yó'o kuu va ndane'e na iin ve'e xí'ín oro, o plata, o xí'ín yuu luu ndáa, o xí'ín yíto, o xí'ín noo tejí'í, o xí'ín ra itá tirió. ¹³ Tído iin rá iin choon kíán ná'a mián á choon va'a kíán o koó. Chí tá ná kasandaá ku keyíko Ndios sa'án, dá kandaá inio ndi ndo'an kee ño'ó kéi. Ta dión kean xí'ín iin rá iin choon, dá chí ño'ó kéi kíán korndodó ñaá. ¹⁴ Tá koó ña'a ndo'o ña ni káva'a na sata sa'a

ve'e ñoó, dá kían natiin na ya'i sa'a choon ni kee na. ¹⁵ Tído tá ná kei ña ni kava'a na, dá kían naá óon va choon ni kee na. Ta va'ará ná káki na, tído ndo'o níó ná táto'on k'i'o ndó'o na yá'a noo ño'ó kéi.

¹⁶ ¿Á kō ná'á ta'on ndo'ó ña kúú ndó ve'e ño'o Ndios, ta Espiritu ná ió ini ndo? ¹⁷ Tá ió iin káa ñayuu ndúkú dánaá na ve'e ño'o Ndios, dá kían dánaá vá ñaá Ndios, chi ve'e ño'o ii Ndios vá kúú ndo'ó.

¹⁸ O sa dándalí ndo mií ndó, chi tá ká'an dao ndo'ó ña kúú ndó na ndichí xí'in ña ndichí ió ñayuu yó'o, dá kían va'a cháá ka kee ndó mií ndó kakuu ndó ñayuu kō ndichí xí'in ña ndichí yó'o, dá kían kasandaá ndo kakuu ndó ñayuu ndichí noo Ndios. ¹⁹ Dá chi ña ndichí ió ñayuu yó'o kían iin ña'a kō choon noo Ndios. Chi di'a va ká'an tuti ii Ndios: “Nátiin Ndios ta ndichí tein ña mañá kée ra.” ²⁰ Ta ká'an ta'anian di'a: “Ná'á vá Ndios ña nákanini ini ta ndichí, ña kían ña kō choon”, kaáan.

²¹ Sa'á ñoó ná dá'a ni chindaya'i ndó mií ndó sa'á ña ndíta ndó xí'in taa yó'o o taa káa, chi ndidaá vá ña'a kúú ña'a mií ndó. ²² Sa'á ñoó Pablo, xí'in Apolos, xí'in Cefas, xí'in ñayuu yó'o, xí'in ña takí yo, xí'in ña kuu yo, xí'in ña ndó'o yó viti, xí'in ña vei ndo'o yó chí noo, ndidaá kúú vá ña yó'o kúú ña'a mií ndó. ²³ Ta ndo'ó kúú kuendá Cristo, ta Cristo kúú kuendá Ndios.

Ká'an Pablo sa'a ndidaá ña'a ni kee na sa'á na kúú kuendá Jesús ndéi ñoo Corinto

4 ¹ Sa'á ñoó kánian kee ndó kuendá ña kúú ndu'u taa kéchóon noo Cristo, ta ni natiin ndu choon ña kían dána'a ndu sa'á ña ná'á iin tó'ón mií Ndios. ² Ta ndidaá na ni natiin iin choon, miían ndúsa kánian na'a na mií ná ña kéndaa na choon ni natiin na. ³ Ta kō né'e tandínii á keyíko ndo sa'á ña kéei, o á taa né'e choon ná keyíko sa'a ña. Ta ni mií yu'u kō keyíko sa'á ña kéei. ⁴ Ta va'ará kō nákanini kuáchii ini noo ña kéei, tído ña yó'o kō kóni kaa ña ni keva'i noo Ndios. Dá chi na keyíko ndaa sa'í kúú sato'o yo Ndios. ⁵ Sa'á ñoó ná dá'a ni chindaa noo ndo keyíko ndo sa'á ña kée ni iin ñayuu. Kandati ndó nda ná nandió koo na kúú sato'o yo Jesús, chi noón kúú na dánátuu ndidaá kúú ña'a ni kedé'é yo. Ta dánátuu ta'ani na ña nákanini ini yo, dá natiin iin rá iin yó ñañó'ó kánian ni'i yo noo Ndios.

⁶ Ñani, ni ka'in sa'a ndidaá ña kée mií xí'in ña kée Apolos sa'á ña kú'u ini ndu sa'a ndo, dá kían kande'é ndó táto'on k'i'o kée ndu, dá katí'a ndó kee ndó táto'on k'i'o sa'ándá tuti ii Ndios choon, dá kían ná dá'a ka ni chindaya'i ndó dao na dána'a noo ndo, ta kenóo ndó dao ka na. ⁷ Ta, ¿ndá yoo kúú ndó, xini ndo? Ta, ¿ndí kían ió noo ndo, ña kían kō ní xí'o Ndios noo ndo? Ni ña'a va. Ta sa'á ña ni ni'i óon ndoan, sa'á ñoó, ¿ndiva'a chindaya'i ndó mií ndó ña ká'an ndo ña kō ní ni'i ndoan, tá dáá?

⁸ Ká'án ndó ña ni iin ña'a kọ kámani noo ndo, ta ká'án ndó ña kuíká ndó xí'ín ña'a Ndios, ta ká'án ndó ña kúú ndó rey, ta kọó kọ choon kúú ndó ndu'u. Tído ndeé kọ vían va'a tá miían ndaa ndisa kúú ndó rey, dá kían ni'i ta'ani ndu ña dándáki nduú ndu'u xí'ín ndó.

⁹ Chì ká'án yu'u ña nda sata kuii ni chikata Ndios ndu'u, ña kúú apóstol. Chì ndó'o ndu'u táto'on kị'o ndó'o ra ni ta'anda choon ña kuu. Ta kúú ndu'u táto'on ñayuu ná'a ña ñayuu yó'o, noo ángel xí'ín noo ñayuu. ¹⁰ Ta ndu'u kúú ñayuu xixi noo ñayuu sa'a ña dána'a ndu sa'a Cristo. Tído ndo'ó, kée ndó mií ndó ña kúú ndó ña ndichí sa'a Cristo. Ta ndu'u kúú ña vitá ini noo ndo'ó, tído ndo'ó kúú ña ndakí. Ta ndo'ó kúú ña ió ñañó'ó, ta ndu'u kúú ra kọó ñañó'ó, xiní ndo. ¹¹ Ta nda viti nda'í kuíko ndu'u, ta nda'í íchi ini ndu, ta kọ ní'i ndú dá'on kandixi ndu. Ta kéndava'a ñayuu xí'ín ndú, ta ni ve'e ndu kọó. ¹² Ta kuitá ndu kéchóon ndu xí'ín ndá'a mií ndú. Ta ká'an ndava'a ñayuu xí'ín ndú, tído ndu'u, xíkà ndu ña va'a sa'a ná noo Ndios. Ta kéndava'a na xí'ín ndu'u, tído xí'o ndeé vá ini ndu. ¹³ Chínani kini na ndu'u, tído luu ká'an ndu xí'ín ná. Ta ni kasandaá ndu kúú ndú táto'on xe'e, chì nda viti kée na xí'ín ndu'u táto'on kị'o kée na xí'ín ña kọ chóon.

¹⁴ Ta kọ táai ña yó'o kosaa noo ndo, dá kaka'an noo ndo. Di'a táai ña kosaa noo ndo, chì kónii ka'an ni'ini noo ndo, chì kúú ndó táto'on de'e maní. ¹⁵ Ta va'ará ná kakomí ndó táto'on uxí mil ta dána'a noo ndo sa'a Cristo, tído iin tó'on vá kúú tatá ndo. Ta yu'u kúú tatá ndo, chì ni daná'i noo ndo ña kúú to'on va'a ña ká'an sa'a Cristo Jesús, ta ni kandísa ndóan. ¹⁶ Sa'a ñoó seí nda'avíi noo ndo ña kee ndó táto'on kị'o kée mií.

¹⁷ Sa'a ñoó ni tanda'a yu'u Timoteo kosaa xi noo ndéi ndó. Ta kúú xí táto'on de'e maní, ta íin ndaa xi xí'ín sato'o yo Ndios. Ta mií xí dándusaa ini ndo táto'on kị'o kée yu'u sa'a ña kándísai Cristo, ta kị'o dión dána'i noo ña kúú kuendá Jesús ndéi iin rá iin xían noo yá'i kua'in.

¹⁸ Ta ió dao ndó ni kasá'a kée ndó mií ndó ña kúú ndó ña ndaya'i, chì ká'án ndó ña o sáa kaji noo ndéi ndó xaan. ¹⁹ Tído yachi nda'o saai koto ni'ini ndo'ó tá kị'o dión kóni sato'o yo Ndios, dá ná kandaa ini á miían ndaa ndisa kómí ña chíndaya'i mií ñóó ndée Ndios, o to'on ká'an oon va na kían. ²⁰ Dá chì tá ñó'o yó tixi ndá'a Ndios, kọ kían ña ka'an oon yó, chì kían ña kómí ndisa yó ndée ná. ²¹ ¿Ndá kían kóni ndo? ¿Á kóni ndo ña saai dánanii ndo'ó, o á kóni ndo ña saai xí'ín ña kú'u ini sa'a ndo, ta xí'ín ña kueé ini?

Sa'ándá Pablo choon noo ñayuu ñoó ña taó xoo na taa ni kee kuachi kini

5 ¹ Miían ndaa ni ni'i tó'in ña tein mií ndó xaan nákaa iin taa kée kuachi ka'an noo. Ta kuachi kini nda'o kían yó'o, chì ni ñayuu kọ ná'a Ndios kọ kée táto'on kị'o kée taa xaan, chì kídì ra xí'ín naná ke'én ra. ² Tído ndo'ó kúú ra kúryíi iì vá ndó. ¿Á kọ ná'a ndó ña kánian

kunda'í va ini ndo, dá taó ndo ta kée kuachi ñoó tein mií ndó xaan? ³ Ta va'ará koó yu'u ió xí'ín ndó xaan, tído kee ndó kuendá ña ió ñaxintóníí xí'ín ndó. Ta sa'á ña kíán táto'on k'i'o ióí xí'ín ndó, sa'á ñoó sa ni keyíkoí sa'á ña kini ni kee taa xaan. ⁴ Ta xí'ín kuu sato'o yo Jesucristo nataka ndo, ta kee ndó kuendá ña ióí xí'ín ndó, ta xí'ín ndée sato'o yo Jesucristo ⁵ nak'i'o ndó taa xaan noo ndá'a ña u'u, dá ná ndo'o níó rá, dá ná naá ña kini kátoó ñíí rá, dá káki níó rá tá ná kasandaá kuu nandió koo tuku sato'o yo Jesús kasaá na.

⁶ Sa'á ñoó ko vá'a ta'on ña kúryíí ndó. ¿Á ko ná'á ta'on ndó ña xí'ín lú'u chí'í vá levadura, ta kúú dákuíta tachí vaan iin tu'u yúsa káva'a pan? ⁷ Sa'á ñoó nduvii ndo mií ndó noó kuachi kée ra, chí kíán táto'on levadura dátuuán ndo'ó, dá kakuu ndó táto'on yúsa saá, ña ko ní kí'in tá'an xí'ín levadura. Dá chí Cristo kúú táto'on léko sa'ání na Israel kéká'ano na víko pascua, chí ni doko ná mií ná sa'a yo. ⁸ Sa'á ñoó ná keká'ano yó víko pascua miíá, ta ná dá'a ni kechóon yó levadura, ña kúú ña kini xí'ín ña ko vá'a. Di'a ná kechóon yó pan, ña ko ní kí'in tá'an xí'ín levadura, ña kúú ña kée yó ña ndaa xí'ín ndino'o ini yo.

⁹ Ta noo iin ka tuti ni tanda'í kosaa noo ndo ká'an ña o sa káne'e tá'an ka ndo xí'ín ñayuu kée kuachi xí'ín na ko kúú yíí ná o ñadi'í na. ¹⁰ Tído ko kóni kaaan ña kankuei xoo ndó tein ñayuu ko ná'á Ndios kée kuachi xí'ín na ko kúú yíí ná o ñadi'í na, xí'ín na kátoó kakomí ña'a dao ka ñayuu, xí'ín na kí'in kuí'íná, xí'ín na ndáño'o yoko. Dá chí miían ndúsa kánian kankuei va ndó ñayuu yó'o, dá kandeé ndó kankuei ndó tein na. ¹¹ Tído tuti ni tanda'í kosaa noo ndo ká'an ña o sa káne'e tá'an ndó xí'ín ñayuu ká'an kúú kuendá Jesús tá kée na kuachi xí'ín na ko kúú yíí ná o ñadi'í na, o tá kátoó na kakomí ná ña'a dao ka ñayuu, o tá ndáño'o na yoko, o tá kúú ná na to'ón, o tá xí'i na, o tá kí'in kuí'íná ná. Ta ni o sa kóo ini ndo kasá'an ndó xí'ín ná. ¹² Chí, ¿ndí kíán kúú yu'u ña keyíkoí sa'á ñayuu ko ná'taka dákuá'a xí'á? Tído, ¿á ko ná'á ndó ña kánian keyíko yo sa'á na dákuá'a dáó xí'á? ¹³ Chí ñayuu ko ná'taka dákuá'a xí'á, mií Ndios kúú na keyíko sa'a ná. Sa'á ñoó taó ndo taa kée kuachi nákaa tein ndó xaan ná ko'on ra.

Ná dá'a ni ko'on ndo noó ta né'e choon tá ndó'o ndó tandó'ó tein mií ndó

6 ¹ ¿Á ko ná'á ndó ña tá naá iin káa ndó xí'ín iin ñani ndo, na kúú kuendá Jesús, ko vá'a ta'on kée ndó tá ná ko'on ndo noó taa né'e choon ñayuu yó'o ka'an kuachi ndó sa'a ñani ndo? ¿Ndiva'a ko ká'an di'a ndó xí'ín na kúú ñayuu Ndios, dá keyíko na sa'a ndo? ² ¿Á ko ná'á ta'on ndo'ó ña kasandaá iin kuu, dá ni'i yóó, na kúú ñayuu Ndios, ña keyíko yo sa'a ndidaá ñayuu? Ta sa'á ña ni'i ndo ña keyíko ndo sa'a ñayuu, sa'á ñoó, ¿ndiva'a o kúú keyíko mií ndó tandó'ó leé ndó'o mií ndó xaan, tá dáá? ³ ¿Á ko ná'á ta'on ndo'ó ña nda ángel ndéi induú

keyíko yó sa'a? ¿Á kō ná'á ta'on ndó ña ió choon ña keyíko yō sa'á ña ndó'o yó ñayuu yó'o? ⁴ Sa'á ñoó, tá ndó'o ndó tãndó'ó ñayuu yó'o, ¿ndiva'a kua'an ndo noó ra né'e choon, tá'an ra kō sa'ání mií sa'á ña'a Ndios? ⁵ Ndidaá kúú ña yó'o ká'in xí'in ndó, dá ná koo cháá ña ka'an noo ndo. ¿Á koó ví iin tã ndichí tein mií ndó xaan kuu keyíko sa'a ndo tá naá iin ñani ndo xí'in iin ka na? ⁶ Chi di'a iin kúú mií ndó, na kúú kuendá Jesús xaan, naá tá'an ndó, ta né'e tá'an ndó kua'an ndo keyíko sa'a ndo noó tãa né'e choon, tá'an ra kō ná'á Ndios.

⁷ Ta sa'á ña naá tá'an mií ndó, sa'á ñoó ná'a ndo mií ndó ña kō ndíta ndaa ndo xí'in Ndios. ¿Ndiva'a kō xí'o ndeé ní iní ndo tá kéndava'a na xí'in ndó? Ta, ¿ndiva'a kō xí'o ndeé ní iní ndo tá kí'in kuí'íná ná ndo'ó? ⁸ Tído di'a kéndava'a ndó xí'in ñani ndo, na kúú kuendá Jesús, ta kí'in kuí'íná ndó na.

⁹ ¿Á kō ná'á ta'on ndó ña o ndú'u ta'on ñayuu kíni noo dándáki Ndios? O sa dándá'í ndo mií ndó, chi o ndú'u na kátoó kudí xí'in ndi ndáa mií vá ñayuu noo ió Ndios, ni na ndáño'o yoko, ni na kídí xí'in na kō kúú yíi ná o ñadi'í na, ni ra kídí xí'in tãa xí'in rá, ni ná'a kídí xí'in ná'a xí'an, ¹⁰ ni na kuí'íná, ni na kátoó téi di'ón, ni na xí'i, ni na kini ká'an, ni na mañá o ndú'u noo dándáki Ndios. ¹¹ Ndidaá ña yó'o ni sa kee dao ndo'ó tá sata, tído sa ni nduvii va ndó noo Ndios viti, ta ni xí'o na ña koo vii ndo, ta ni kandoo vii ndo noo Ndios sa'á ña kándéé iní ndo sato'o yō Jesús, xí'in sa'á ña ni natiin ndó Espíritu iñ Ndios.

Ná dá'a ni kee ndó kuachi xí'in na kō kúú yíi ndo o ñadi'í ndo

¹² Ndidaá vá ña'a kuu kee yó, tído o duú ndidaá ña kí'o ña va'a noo yō. Ndidaá vá ña'a kuu kee yó, tído ná o kí'o yó mií yó noo ni iin ña'a ña dándákian yó. ¹³ Ni kava'a Ndios ña'a kaxío kaño'o tixío, ta ni kava'a tii yó ña kaño'o ña'a kaxío, tído ndi nduú vaan dánaá na. Tído kō ní kava'a na ñii yō ña kían kudí yō xí'in ndi ndáa mií vá ñayuu. Chi di'a ni kava'a na ñii yō, dá koni kuáchí yó noo mií ná, ta mií ná kúú sato'o ñii yō.

¹⁴ Chi Ndios, na ni danátaki sato'o yō Jesús, noón ta'ani kúú na dánátaki yó xí'in ndéé ná.

¹⁵ ¿Á kō ná'á ta'on ndó ña ñii ndo kúú kuendá Cristo? Sa'á ñoó, ¿a kuu ko'o xí'in ñii yō, ña kúú kuendá Cristo, ta dákí'in tá'an yóan xí'in ñii iin ná'a díkó míi noó tãa? Koó, o kúú ta'on. ¹⁶ ¿Á kō ná'á ta'on ndó ña tá ni ñaki'in tá'an ñii iin tãa xí'in ná'a díkó míi, dá kían ni nduu na iin tó'ón vá? Dá chi di'a ká'an tuti iñ Ndios: “Tá ni ñaki'in tá'an iin tãa xí'in iin ná'a, dá kían ni nduu na iin tó'ón vá.” ¹⁷ Tído na ni ñaki'o mií noo sato'o yō Jesús, dión ni nduu na iin tó'ón xí'in ná.

¹⁸ Kuino kíi ndo noó ña kátoó ndo kudí ndo xí'in na kō kúú ñadi'í ndo o yíi ndo. Dá chi ndidaá ka kuachi kée ñayuu kō kían kuachi kée na xí'in ñii míi ná, tído na kée kuachi xí'in na kō kúú yíi ná o ñadi'í na, noón kúú na yá'a kée kuachi xí'in ñii míi ná. ¹⁹ Chi, ¿a kō ná'á ta'on ndó

ñā yikí koño ndo kúú ve'e ño'o noo ió Espíritu ij Ndios? Chī ió na ini ndo, chī ni natiin ndó na noo Ndios. Sa'á ñoó ko dándáki ka ndo mií ndó,²⁰ dá chī ya'i nda'o ni chiya'i Ndios sa'a ndo. Sa'á ñoó keká'ano ndó Ndios xí'ín ñī ndo, xí'ín espíritu ndo, chī ñā'a Ndios kíán.

Ká'an ni'ini Pablo noó ñayuu sa'a ndí kíán kee na tá tanda'a ná

7¹ Ta viti kíán ko'in kasto'in xí'ín ndó sa'á ñā ni ndato'ón ndó yu'u noo tuti ni tanda'á ndó ni kii nooí, á ñā va'a cháá ka kíán ñā ná o tanda'a taa xí'ín ñá'a.² Tído sa'á ñā ióan ya'a ndó kee ndó kuachi xí'ín na ko kúú yíi ndo o ñadi'í ndo, sa'á ñoó va'a cháá ka ná koo ñadi'í iin rá iin ndó, ta iin rá iin na ñá'a ná koo yíi ná.³ Ta iin rá iin taa kánian kudi nduú ra xí'ín ñadi'í ra, ta k'i'o dión ta'ani kánian kee na ñá'a xí'ín yíi ná.⁴ Dá chī na ñá'a ko dándáki ka na ñī ná, ndaá yíi vá ná kúú ra dándáki ñāá. Ta ni taa ko dándáki ka ñī rá, ndaá ñadi'í ra kúú na dándáki ñāá.⁵ Sa'á ñoó o sa kadí'inda ndo ñī ndo noo yíi ndo o noo ñadi'í ndo. Tído tá ni kandoo mií ndó ñā o náki'in tá'an ndó dao kuu, chī kóni ndo kane'e ij ndo ka'an ndo xí'ín Ndios, dá kíán kuu va kee ndó dión. Tído ndi'i daá, naki'in tá'an nduú tuku ndó, chī oon ni ví o kí'o ndeé iní ndo, ta kexíxi ñā u'u xí'ín ndó, dá ya'a ndó kee ndó kuachi xí'ín iin ka na.

⁶ Ndidaá ñā'a ká'in xí'ín ndó yó'o kíán ká'an ni'inii noo ndo, tído ko kúú ta'an vaan choon sa'ándái noo ndo.⁷ Ká'an yu'u ñā va'a cháá ka kíán ñā ná kandeí mií ndidaá taa táto'on k'i'o ió mií yu'u. Tído díin díin va ñā'a ni ni'i tá'i iin rá iin ñayuu noo Ndios, chī ió dao na ni ni'i tá'i ñā k'i'o ndeé iní na kandeí mií ná, ta ió ta'ani dao na ni ni'i tá'i ñā tanda'a ná.

⁸ Ta ñā yó'o ká'an yu'u xí'ín takuáchí táki, xí'ín na kuáan ñā iin ñā va'a kíán ñā ná kandeí mií ná táto'on k'i'o kée yu'u.⁹ Tído tá ko xí'o ndeé iní na chituu na ñā kóni ñī ná, dá kíán va'a cháá ka ná tanda'a ná. Dá chī va'a cháá ka ñā tanda'a ná o duú kaan ndo'o níó ná koni na iin taa o iin ñá'a.

¹⁰ Ta noo ndo'ó, na ni tandá'a, sa'ándái choon noo ndo, tído ko kíán choon ni ndaki ñaxintóníi, chī choon sa'ándái mií sato'o yo Ndios nooí kíán, ñā ndo'ó, na ñá'a, o sa dánkoo ndó yíi ndo.¹¹ Tído tá sa ni dánkoo iin ñá'a yíian, dá kíán ná dá'a ni tanda'an xí'ín iin ka taa. Va'a cháá ka ná ndaka ñā maní noo sátá'an iin rá iin na, dá naki'in tá'an tuku na kandeí na. Ta ndo'ó, ra taa xaan, o sa dánkoo ndó ñadi'í ndo.

¹² Ta ió ñā ka'in xí'ín dao ka ndo, va'ará ko ká'an sato'o yo Ndios sa'án. Tá ió iin káa ñani yo, ta ko kándísa ñadi'í ra Jesús, tído ióan ñā koo iian xí'ín rá, dá kíán ná dá'a ni dánkoo ñāá rá.¹³ Tá ió iin káa na ñá'a kándísa Jesús, ta ko kándísa yíi ná, tído tá ió ra ñā koo ij rá xí'ín ná, dá kíán ná dá'a ni dánkoo ñāá ná.¹⁴ Chī iin yíi ko kándísa Jesús, ndé'é va'a ñāá Ndios sa'á ñā kándísa ñadi'í ra. Ta iin ñadi'í ko kándísa Jesús, ndé'é va'a ñāá Ndios sa'á ñā kándísa yíian. Chī tá ko kíán dión,

dá kían kandoo kini de'e na noo Ndios, tído viti kúú xí takuáchí vii noo ná.

¹⁵ Tído tá ká'an yíi ndo o ñadi'í ndo, na ko kándísa Jesús, ña dánkoo na ndo'ó, dá kían konó ndó ná kee na dión. Chì nì ndaxì ndo noo ña nì tandá'a ndó xí'ín ná tá ndó'o ndó dión. Chì nì nakana Ndios ndo'ó ña kían kandeì va'a ndó. ¹⁶ Chì ndo'ó, na ñá'a xaan, ÷xíni á kandeé ndó xí'ín yíi ndo, dá nduu ra kuendá Jesús? Ta ndo'ó, ta kúú yíi, ÷xíni á kandeé ndó xí'ín ñadi'í ndo, dá nduu na kuendá Jesús?

¹⁷ Tído iin rá iin ndó kánian koo tát'on nì xì'o mií sato'o yo Ndios koo ndó tá nì nakana ñaá ná xoo mií ná. Ta ña yó'o kían dána'i noo ndidaá kúú na kúú kuendá Jesús iin iin xían noo xíonooi. ¹⁸ Sa'a ñoó, ¿á sa nì ta'anda ñíi ndo tá nì nakana ñaá Ndios? Dá kían nda dión koo va ndó. ¿Á ió dao ndó ko ñá'a ta'anda ñíi tá nì nakana ñaá Ndios? Dá kían ná dá'a ni ka'anda ndoán. ¹⁹ Dá chì ña ta'anda ñíi yo xí'ín ña ko ní ta'anda ña, ni iin ña'a ko ndáya'i ña, dá chì ña ndáya'i noo Ndios kían kee yó choon sa'ándá na. ²⁰ Sa'a ñoó kánian koo iì ndo tát'on kì'o ndáa ndó tá nì nakana ñaá Ndios xoo mií ná. ²¹ ¿Á nì sa ño'o ndó tìxi ndá'a iin sato'o tá nì kana ñaá Ndios? Ná dá'a ni nakani ini ndo. Tído tá ió tandéé ini ña kankuei ndó tìxi ndá'a sato'o ndo, dá kían cho'on ini ndo yaa ndo. ²² Chì ndo'ó, na sa ño'o tìxi ndá'a iin sato'o tá nì kana ñaá Ndios, ndo'ó kúú na nì taó xoo Ndios tìxi ndá'a kuachi, dá nono ndo kee ndó ña kóni na. Ta ndo'ó, na ko ní sá ño'o tìxi ndá'a iin sato'o tá nì nakana ñaá Ndios, viti kían nì ndu'u ndó tìxi ndá'a Cristo, dá koni kuáchí ndó noo ná. ²³ Ya'i nda'o nì chiya'i Ndios sa'a ndo, sa'a ñoó ná dá'a ni nachì'i ndó mií ndó tìxi ndá'a ni iin tó'on ñayuu. ²⁴ Sa'a ñoó, ñani, tát'on nì sa ndaa iin rá iin ndó tá nì nakana ñaá Ndios, kì'o dión iì ní koo ndó noo ná.

²⁵ Ta viti ko'in ka'in cháá xí'ín ndó sa'a na takí, va'ará ko ta'on choon ní nì'i noo sato'o yo Ndios kían. Tído ká'an nì'inii noo ndo tát'on kì'o ká'an mií yu'u kúú ña va'a, chì sa'a ña kú'u ini sato'o yo Ndios sa'í, sa'a ñoó kúú iin taa ká'an ña ndaa. ²⁶ Ta sa'a ña ndéi yó tiempo u'u nda'o, sa'a ñoó ká'an yu'u ña va'a cháá ka ná kandeì mií ndó, ta taa, tát'on kì'o ndéi ndó. ²⁷ Tá ió ñadi'í ndo, o sa dánkoo ñaá ndó. Ta tá koó ñadi'í ndo, o sa ndí'i ini ndo tanda'a ndo. ²⁸ Tído tá ná tanda'a ndo, ko ta'on kuachi kían. Ta dión ta'ani takuáchí di'í táki, ko ta'on kuachi kían tá ná tanda'a xí. Tído na tánda'a, kasá'a ndo'o níó ná, ta ko kóni yu'u ña ndo'o ndó dión.

²⁹ Tído ña yó'o ká'an yu'u xí'ín ndó, chì ndadá cháá vá tiempo kámani noo yo. Sa'a ñoó ndo'ó, na ió ñadi'í, kee ndó kuendá ña koó ná ió, ta ndí'i cháá ka ini ndo sa'a Ndios. ³⁰ Ta ndo'ó, na kúnda'í ini, kee ndó kuendá ña ko kúnda'í ini ndo. Ta ndo'ó, na ndéi dii, kee ndó kuendá ña ko ndéi dii ndo. Ta ndo'ó, na xíin, kee ndó kuendá ña koó ña'a ní xíin ndó. ³¹ Ta ndo'ó, na kéchóon ña'a ió ñayuú yó'o, ná dá'a ni ndí'i ini ndo

sa'án. Dá chí ñayuu ndéi yó viti naá váan xí'ín ndidaá kúú ña'a ió nooán.

³² Chí ña kóni yu'u kían ña ná dá'a ni nakani téi ini ndo sa'a ña'a ió ñayuu yó'o. Chí na ko ná'a tanda'a, ndí'i cháá ka ini na sa'a ña'a sato'o yo Ndios, chí ndúkú ná ña nata'an ini sato'o yo koni ñaá ná. ³³ Tído taa ni tandá'a, nákani cháá ka ini ra sa'a ña ió ñayuu yó'o, chí ndúkú rá ña nata'an ini ñadi'í ra koni ñaáán. ³⁴ Ta dión ta'ani ko kúú nóo ta'an vaan xí'ín ná'a ió yíi xí'ín ná'a koó yíi. Chí ná'a koó yíi, ndí'i inian sa'a ña'a sato'o yo Ndios, chí ndúkúán ña kandoo vii ñíian, xí'ín níman noo Ndios. Tído di'a ná'a ió yíi, ndí'i cháá ka inian sa'a ña ió ñayuu yó'o, chí ndúkúán ña nata'an ini yíian koni ñaá rá. ³⁵ Ká'in ndidaá ña yó'o xí'ín ndó, dá ni'i iní cháá ka ndo ndi kee ndó. Ta ko ká'in sa'a ná sa'a ña kóni chituui ndo'ó. Ña kóni yu'u kían kee ndó ña va'a xí'ín ña ndísá'ano, dá kían ni iin tó'ón ña'a ná o kétéin noo ndo kee ndó ña kóni Ndios.

³⁶ Tá ió iin káa ndó ká'án ña ko va'a ta'on ña kuyatá de'e di'í táki ndo, ta ká'án ndó ña kánian tanda'a xí, dá kían kuu k'i'o ndó ña tanda'a xí, chí ko ta'ón kuachi kían. ³⁷ Tído ndo'ó, na ió ini ña ná o tanda'a de'e di'í ndo, ta o duú ña miían ndúsa kían ña tanda'a xí, ta nóo noo ndo kee ndó ña kían kóni mií ndó, tá sa ni chikaá ini ndo ña o tanda'a ta'ón de'e di'í táki ndo, dá kían va'a va kée ndó. ³⁸ Sa'a ñoó, na xí'o de'e di'í na tanda'a xí, va'a kée na, ta na ko xí'o xi tanda'a xí, va'a cháá ka kée na.

³⁹ Ta iin ná'a ió yíi, ni kato tá'an xí'ín yíian noo ley xíian nani takí ra ió ra. Tído tá ni xi'i yíian, dá kían ni nono nooan tanda'an xí'ín ndi ndáa taa kóni miían, tído taa kándisa sato'o yo Cristo ná kakuu ra. ⁴⁰ Tído kaá yu'u ña va'a cháá ka ví keeán tá ná o tanda'a tukuán, ta ká'ín ña k'i'o dión ta'ani kóni Espíritu i Ndios.

Ká'an ni'ini Pablo sa'a koño dóko ñayuu ko ná'a Ndios noo yoko

8 ¹ Viti, dá kua'in kasto'in xí'ín ndó sa'a koño dóko ñayuu noo yoko. Sa kátóni va'a ini yo sa'a ña yó'o. Tído sa'a ña kátóni ini yo, ña yó'o kédaá xí'á, sa'a ñoó kúryíi yó. Tído tá kú'u ndisa ini yo sa'a ñayuu xí'ín yó, dá dákuá'ano yó na xí'ín to'on Ndios. ² Tá ió iin káa ndó ká'án ña ná'a nda'o ndó sa'a iin ña'a, di'a ko ná'a ndó sa'án táto'on k'i'o kánian kana'á ndó. ³ Tído tá miían ndaa kóni yo Ndios, dá kían ná'a ná yó, ña kúú yó ñayuu na.

⁴ Ta viti ko'in ka'in xí'ín ndó sa'a ña dóko ñayuu noo yoko. Ná'a yó ña ko ta'ón ña'a ndáya'i yoko ndéi ñayuu yó'o, chí koó ka iin ka ndios, sa'ava iin tó'ón diní vá kúú Ndios. ⁵ Va'ará ká'an ñayuu ña ndéi dao ka ndios induú o noño'o yó'o, chí kaá na ña kua'á nda'o ndios xí'ín kua'á nda'o sato'o ndéi, ⁶ tído noo yóo, iin tó'ón diní vá kúú Ndios, na kúú tatá yo, na ni kava'a ndidaá kúú ña'a, ta noón kúú na xí'o ña takí yo kéchóon yó noo ná. Ta iin tó'ón diní ta'ani kúú sato'o yo Jesucristo. Ta

xí'ín ndá'a míí ná ió ndidaá kúú ña'a, ta mií ná kedaá xí'á, dá takí yo ndéi yó.

⁷ Tído o duú ndidaá ñayuu kátóni ini sa'á ña yó'o. Dá chi ñó'o dao ñayuu tein ndó, nda kuálí ná ni kasá'á ná ndáño'o na yoko. Sa'á ñoó tá seí na koño ni doko ñayuu noó yoko, ká'án ná ña sa ndáño'o ta'ani na yoko ñoó, ta kasá'á ná nákaní kuáchí ini na sa'á ña ko ná'á va'a na, ta ká'án ná ña ni yakó na noo Ndios. ⁸ Sa ná'á vá yó ña o duú ña'a seí yo kedaá xí'ín yó, dá kandoo va'a yó noo Ndios. Dá chi ko kúú yó ñayuu ndáya'i cháá ka noo ná sa'á ña seí yo dao ña'a, ta ni o kándoo nóo yó noo ná sa'á ña ko seí yo dao ka ña'a. ⁹ Tído kaon koo ndó, chi va'ará kuu keí ndoán, tído ná dá'a ni kì'o ndó ña kíán kuei dao na kómani kua'ano xí'ín to'on Ndios noó kuachi sa'á ña seí ndoán. ¹⁰ Dá chi tá ná koni na iin káa ndo'ó, na sa ná'á sa'á ña yó'o, ta ió ndo seí ndo koño ini ve'e noo ndáño'o ñayuu yoko, dá kíán ka'án ta'ani na keí ná ña, va'ará nákaní kuáchí ini na keí náan. ¿Á ko ná'á ta'on ndó ña sa'á ña kée ndó dión, sa'á ñoó xíno ini na keí ná koño ni doko ñayuu noó yoko? ¹¹ Ta sa'á ña ná'á va'a ndó ña ko ta'ón kuachi kíán keí ndó koño ñoó, sa'á ñoó dátúú ndó ñani ndo, na ko ná'a kua'ano xí'ín to'on Ndios, na ni chiya'i Cristo sa'a. ¹² Ta sa'á ña yá'a ndó kée ndó kuachi noo ñani ndo, ta sa'á ña xí'o ndó ña xíno ini na kée na ña ká'án ná kúú kuachi, sa'á ñoó yá'a ndó kée ndó kuachi noo míí Cristo. ¹³ Sa'á ñoó tá ña'a seí yu'u kedaá xí'ín ñanii, dá kuei na noó kuachi, dá kíán ni iin kuu ka ná o kaxíi koño, dá kíán ná dá'a ni ya'a ñanii kee na kuachi sa'a yú'u.

Ká'an Pablo ña kúú ná iin apóstol

9 ¹ ¿Á ko ná'á ta'on ndó ña kúú iin apóstol, na né'e to'on Jesús? ¿Á ko ná'á ta'on ndó ña kuu kee yu'u ndidaá ña'a kée dao ka apóstol? ¿Á ko ná'á ta'on ndó ña ni xini ta'ani yu'u Jesús, na kúú sato'o yo? ¿Á ko ná'á ta'on ndó ña ni nduu ndó kuendá Jesús sa'á ña kéei choon ni xí'o sato'o yo nooí? ² Ndá ndi kuu ko kándía dao ka ñayuu ña miían ndaa kuiti kúú yu'u apóstol Jesús, tído ndo'ó kúú na kánian nakoni ndo yu'u. Ta sa'á ña kúú ndó kuendá sato'o yo Jesús, ñoó kíán ná'a ña kúú iin apóstol.

³ Ta ña yó'o kúú to'on ká'in xí'ín ndo'ó, na kána'á xí'ín ndéi xaan: ⁴ ¿Á ko ta'ón íchi ndú ña kì'o ndó ña'a kasá'an ndu, ña kì'o ndó ña'a ko'o ndu? ⁵ ¿Á ko ta'ón íchi ndú ña kandaka ndu na ná'a kándísa Jesús kakuu ñadi'í ndu, ta kanoo nduú na xí'ín ndú, táto'on kì'o kée dao ka na kúú apóstol, xí'ín ñani sato'o yo Jesús, xí'ín Cefas? ⁶ ¿Á sava'a yu'u xí'ín Bernabé kúú na kánian koto míí xí'ín choon kée ndu? ⁷ Ta, ¿ndi káa iin soldado xíto míí xí'ín di'ón míí rá? Ta, ¿ndi káa iin taa xíti uva, ta ko seí ra uva kána noño'o rá? Ta, ¿ndi káa iin taa ndáka léko, ta ko xí'i ra lechí ri?

⁸ ¿Á ká'án ndó ña nákanini ini taa ká'in xí'in ndó? ¿Á kō ná'á ta'on ndó ña dión ta'ani ká'an ley Moisés? ⁹ Dá chī ley Moisés kīan kaá di'a: “O sa taán ndo ñóno yú'u chee tá sádi rī tirió, dá ná kuu keí rī chááán.” ¿Á ká'án ndó ña ndí'i ini Ndios sava'a sa'á chee? ¹⁰ O, ¿á nī taa ta'ani na to'on yó'o sa'a yóó? Sa'a yóó nī taa naan. Ta dión ni na xíti, ió tandeé iní noo ná ña natiin na ña'a noñó'o nī xiti na, ta na sádi tirió, ió ta'ani tandeé iní noo ná ña natiin na ña'a noo nī nduvii na ñóo.

¹¹ Ndu'u kúu na nī chi'i tata ña kúu to'on Ndios ini níno ndo, sa'á ñóo, ¿á kakian iin ña dáta'án nda'o ndu'u ndo'ó ña natiin ndu'u cháá ña xínñó'ó ndú noo ndo? ¹² Tá dao ka va taa kúu ra nátiin ña xito ndó ra, ta va'a cháá ka ví kánian kee ndó xí'in ndu'u.

Ta va'ará ió íchi ndú ña koto ñaá ndó, tído kō kéchóon ta'on ndu'an. Di'a xí'o ndeé vá iní ndu noo ndidaá ña'a, dá kīan ni iin ña'a ná o kétéin noo ñayuu ña kandísa na to'on va'a sa'a Cristo Jesús. ¹³ ¿Á kō ná'á ta'on ndó ña taa kéchóon noo Ndios ini ve'e ño'o ká'ano seí ra ña ñó'o ini ve'e ñóo, ta ra dóko kítī noo náa seí ra cháá koño rī? ¹⁴ Dión ta'ani nī sa'anda sato'o yo Jesús choon ña na xionoo dána'a to'on va'a sa'a ná, kánian kataki na noo choon kée na.

¹⁵ Tído yu'u, ni iin kuu ta'ón kō ní ka'in xí'in ndó ña koto ndó yu'u, ta ni kō táai to'on yó'o kosaa noo ndo sa'á ña kónijī ña koto ndó yu'u. Va'a kaan ná kuu di'a yu'u, o duú ka ña dítá ndó ña náta'an ini sa'á ña kō kí'in ya'i noo ndo. ¹⁶ Tá dána'a yu'u to'on va'a sa'a Jesús, dá kīan kō kánian chindaya'i yu'u miíí, dá chī nī ta'anda choon noo ña dión kánian kee. Nda'í yu'u tá ná o dána'i to'on va'a yó'o.

¹⁷ Tá nī chīkaa ini mií yu'u kee choon yó'o, dá kīan kuu va natiin ya'i noo ndo. Tído o duú mií yu'u ní chíkaa ini kee ña, dá chī choon nī ta'anda noo vá yu'u kían. ¹⁸ Ta, ¿ndí kīán va'a nátiin yu'u, tá dáá? Ña va'a nátiin yu'u kīan náta'an ini sa'á ña kō kí'in ya'avii noo ndo dána'i to'on va'a sa'a Cristo Jesús. Chī kō kónijī dándi'i ini ndo'ó kee ndó ña kánian kee ndó xí'in sa'á ña dána'i to'on va'a sa'a Jesús.

¹⁹ Ta sa'á ña kō nákaaí tixi ndá'a ni iin tó'ón ñayuu, sa'á ñóo nónóí kī'oi miíí konkuáchíí noo ndidaá kúu ñayuu, dá kīan kandeéí ña kandísa kua'a cháá ka na to'on va'a sa'a Jesús. ²⁰ Sa'á ñóo, tá nákaaí tein na kúu na Israel, dá kéei miíí kúu iin na Israel, dá kandeéí kandísa na Jesús. Chī tá nákaaí tein na ñó'o tixi ndá'a ley Moisés, ta va'ará kō nákaaí tixi ndá'a ley ñóo, tído kéei miíí ña nákaaí tixi ndá'án, dá kandeéí kandísa na Jesús. ²¹ Ta dión ta'ani kée yu'u tá nákaaí tein ñayuu kō ñó'o tixi ndá'a ley Moisés, chī kée yu'u miíí ña kō nákaaí tixi ndá'a ley. Tído kō kóni kaaan ña kō seídó'o yu'u choon sa'ándá ley Ndios, chī nákaaí tixi ndá'a Cristo. Dión kéei, dá kandísa na kō ñó'o tixi ndá'a ley to'on va'a Jesús. ²² Tá nákaaí tein na kō ñá'a kua'ano xí'in to'on Ndios, dá kīan kée yu'u miíí táto'on kī'o kúu mií ná, dá kandeéí kua'ano na xí'in to'on Ndios. Ta daá kuití vá kée yu'u miíí táto'on kī'o kúu iin rá iin ñayuu, dá

kandeéí kākí dao na noó kuachi na. ²³ Ndidaá kúú ña yó'o kée yu'u, dá naka'ani cháá ka to'on va'a sa'a Jesús kua'an, ta k'i'o dión kandeé ta'ani yu'u ni'í ña kúú ña va'a sa'a to'on va'a yó'o.

²⁴ ¿Á kō ná'a ta'on ndó ndi ndó'o taa taxí tá'an? Chi ndidaá vá rá ndúndéé taxí tá'an, tído iin tó'on vá kúú rá kándéé. Ta k'i'o dión ta'ani ndundéé ndó kuita ndaa ndo xí'in to'on Ndios, dá kandeé ndó ni'i ndo ña kánian natiin ndó. ²⁵ Ta k'i'o dión ta'ani ndó'o rá ko'on chídáo tá'an, chi ndí'i nda'o ini rá kénduu rá mií rá, dá kandeé rá ni'i rá iin corona, ña naá óon. Tído yóó kúú na ndí'i ini kuita ndaa xí'in Ndios, dá ni'i yo iin corona, ña ni iin kuu o naá. ²⁶ Sa'a ñoó k'i'o dión ndaa kánkonoí íchi Ndios, chi kō kánkono naá ta'on yu'u. Ta k'i'o dión ta'ani kéei tá naái xí'in ña kini, chi kō kéei táto'on kée na dáko'on yikí noo táchi. ²⁷ Di'a dándó'o yu'u ñííí, ta kéndúsai xí'an, dá kandeéí ña kean ña kóni Ndios. Dá chi tá koó, dá kían, va'ará ni daná'i noo dao ka ñayuu, oon ni ví o kandeéí kasandaái nda noó ni chiná'a Ndios.

Kuino kii ndo noó yoko, ta o sa kandaño'o ndoan

10 ¹ Tído kō kónii, ñani, ña nandodó ndo ña ni xika na sá'ano ñoo ndu'u tixi káti viko, ña ni kasto'on xí'in ná noo kánian ko'on na. Ta ndidaá vá ná ni chika'anda me'í taño'o naní Taño'o Kua'a. ² Ta k'i'o dión ni ndu'u na tixi ndá'a Moisés, chi kían táto'on ni sodo ndúta ná xí'in viko ñoó xí'in taño'o ñoó. ³ Ta ndidaá ná ni seí ña'a ni tanda'a Ndios ni kii induú, ⁴ ta ndidaá ta'ani na ni xi'i takuí ni xi'o Ndios noo ná. Chi ni xi'i na takuí ni kana ndika káo, ta káo ñoó kúú Cristo. ⁵ Tído kua'a nda'o ñayuu ñoó kō ní náta'an ini Ndios koni na. Sa'a ñoó ni kandoo yikí koño na noño'o ichí ñoó.

⁶ Ndidaá kúú ña yó'o kían kasto'on xí'in yó ña kō vá'a ta'on ña katoó yo kee yó ña kini táto'on k'i'o ni kee ñayuu ñoó. ⁷ Sa'a ñoó o sa kandaño'o ndó yoko táto'on ni kee dao ñayuu ñoó, chi di'a ká'an tuti ii Ndios: “Ni sa ndei na ni sasá'an na, ta ni xi'i na, dá ni ndakuei na ni sa ndei dii ná noó yoko.” ⁸ Ta ná dá'a ni kee yó kuachi xí'in na kō kúú ñadi'í yo o yí yo táto'on k'i'o ni kee dao ñayuu ñoó. Chi sa'a ña ni kee na dión, sa'a ñoó iin kuu ni xi'i oko oni mil na ni kee Ndios. ⁹ Ta ná o sa kóo ini yo korndodó yó sato'o yo Ndios táto'on k'i'o ni kee dao ñayuu ñoó, chi sa'a ña ni kee na dión, sa'a ñoó kua'a ná ni xi'i tá ni seí ñaá koo. ¹⁰ Ta ni o sa ká'an kuachi ndó noo Ndios táto'on ni kee dao ñayuu ñoó, chi sa'a ña ni kee na dión, sa'a ñoó kua'a ná ni xi'i ni kee iin ángel né'e choon sa'ání ñayuu.

¹¹ Ndidaá kúú ña yó'o kían ni ndo'o ñayuu ñoó, ta kasto'an xí'in yó ña ná o sa kóo ini yo kee yó dión, ta ni taa naan noo tuti ii Ndios ka'an ni'inian noo yóó, na ni kasandaá ndéi tiempo noo ndí'i. ¹² Sa'a ñoó ndi ndaa ndó ká'an ña ndíta toon ndó xí'in Ndios, dá kían kanda ndo mií ndó, dá ná dá'a ni kuei ndó noó kuachi. ¹³ Kana'a ndó ña tandó'o ndó'o

ndó, iin nóó vá kúúán xí'ín t̄andó'ó ndó'o ndidaá ka ñayuu. Tído iin na ndaa kúú Ndios, chí ọ kónó ta'on na ña ndo'o cháa ka níọ ndo noó ña ọ k̄i'o ndeé iní ndo. Dá chí di'a k̄i'o va Ndios t̄andeé iní noo ndo, dá kandeé ndó kankuei ndó noó t̄andó'ó xírndodó ñaá.

¹⁴ Sa'á ñoó, na man̄i mīi, taó xóo ndó mií ndó noó ña kúú yoko, ọ sa kándaño'o ndóan. ¹⁵ Ká'in xí'ín ndó t̄at̄o'on ká'in xí'ín na kánda ini. Sa'á ñoó taó kuendá va'a ndó sa'á ña ká'in xí'ín ndó yó'o. ¹⁶ Tá xí'i yó copa ndutá uva, ndirá dándáki ña n̄i kee Cristo Jesús sa'a yo, ta náki'o yó ndivé'e noo Ndios sa'a ra, íá ko ná'á ta'on ndó ña iin n̄i nduu yó xí'ín Cristo n̄i kee n̄i ná? Ta tá dákuáchi yó pan, dá seí yoán, íá ko ná'á ta'on ndó ña iin n̄i nduu yó xí'ín Cristo sa'á ña n̄i x̄i'o na yikí koño na n̄i x̄i'an sa'a yo? ¹⁷ Va'ará kua'a vá kúú yó, tído iin tó'ón vá pan seí yo, sa'á ñoó iin tó'ón vá n̄i nduu yó, chí iin tó'ón vá pan seí ndi'i yó.

¹⁸ Kande'é ndó t̄at̄o'on kée na Israel. Chí seí na cháa koño kít̄i dóko ná noo náa, ta, íá ko ná'á ta'on ndó ña kían t̄at̄o'on iin n̄i nduu na xí'ín noo náa ñoó? ¹⁹ Ta sa'á ña ká'in dión xí'ín ndó, íá kóni kaa ña ndáya'i yoko, ọ ndáya'i ña dóko ñayuu nooán? ²⁰ Koó, chí ña ká'in xí'ín ndó kóni kaa ña tá dóko ñayuu ko ná'á Ndios koño noó yoko, noó ña u'u va dóko náan, ta ọ duú noo Ndios takí, ta ko kóni ta'on yu'u ña iin nduu ndó xí'ín ña u'u.

²¹ Sa'á ñoó ko kánian ko'o ndó copa kuendá Cristo, na kúú sato'o yo, ta ko'o ta'ani ndó copa kuendá ña u'u, chí ko kánian kasá'an ndó mesa kuendá sato'o yo Cristo, ta iin nduu ndó xí'ín ná, ta kasá'an ta'ani ndó noo mesa kuendá ña u'u, ta iin nduu ndó xí'án. ²² Íá ko ná'á ta'on ndó ña dár'u'u yo sato'o yo noó ña kuión na tá kée yó dión? Íá ká'án ndó ña ndakí cháa ka yo ọ duú Ndios?

Ná dá'a ni ndukú yó ña va'a mií yó. Di'a nandukú yó ña va'a dao ka na

²³ Ndidaá vá ña'a kuu kee yó, tído ọ duú ndidaá ña k̄i'o ña va'a noo yo. Ndidaá vá ña'a kuu kee yó, tído ọ duú ndidaá ña dákuá'ano dao ka ñayuu. ²⁴ Ọ sa ndí'i ini ndo sa'á ña kandeí va'a ndó, di'a ndi'i ini ndo ña ná kandeí va'a dao ka ñayuu. ²⁵ Ta ndi ndáa mií koño kúya'i noo díko náan, kuu va keí ndoán. Ta ọ sa ndát̄o'ón ndó ndeí n̄i kixian, dá kían ná dá'a ni kasá'á nakani kuáchi ini ndo. ²⁶ Dá chí ña'a sato'o yo Ndios kúú iin ní kúú vá ñayuú yó'o xí'ín ndidaá kúú ña'a ió nooán. ²⁷ Tá n̄i kana iin na ko ná'á Ndios ndo'ó ña ko'on ndo ve'e na kasá'an ndó xí'ín ná, ta tá ká'án ndó ko'on ndo, keí ní ndó ndidaá kúú ña xí'o na noo ndo. Ọ sa ndát̄o'ón ndó ndeí n̄i kixian, dá kían ná dá'a ni kasá'á nakani kuáchi ini ndo. ²⁸ Tído tá ió iin na kaa xí'ín ndó: “Koño n̄i dok̄o ná noó yoko vá kían xaan”, dá kían ná dá'a ni keí ndoán sa'á ña n̄i ka'an na dión, dá ná ọ nákani kuáchi ini na kande'é ná ndo'ó, dá chí ña'a sato'o yo Ndios kúú

iin ní kúú vá ñayúú yó'o xí'ín ndidaá kúú ña'a ió nooán. ²⁹ Ká'in sa'á ña nákanini ini dao ka na, o duú sa'á ña nákanini ini mií ndó.

Tído ndá ndi kuu kaa ndo xí'ín: “¿Ndiva'a kánian chituu yu'u ña nónói keei sa'á ña nákanini kuáchi ini dao ka ñayuu? ³⁰ Chi tá ni naki'o va yu'u ndivé'e noo Ndios sa'á ña'a saxii, ¿ndiva'a ká'an u'u ñayuu sa'í, ta sa ni naki'o yu'u ndivé'e noo Ndios sa'an?” ³¹ Sa'á ñoó tá sásá'an ndó, o xí'i ndó, o kée ndó dao ka ña'a, daá kuití kee ndóan sa'a Ndios, dá ná natiin na ñañó'ó. ³² O sa kákuu ndó táto'on iin ña'a kétéin noó ñayuu, dá kuei na noó kuáchi, á mií ná kúú ná ña ñoo Israel, o á mií ná ko kúú ná ña ñoo Israel, o á mií ná kúú ná kuendá Cristo. ³³ Chi dión kée mií yu'u noó ndidaá ña kéei, chi ndúkúí ña nata'an ini ndidaá ñayuu, chi ko kée yu'u sa'a mií, di'a kée yu'u sa'a dao ka na, dá ni'i ná ña káki na noó kuáchi na.

11 ¹ Sa'á ñoó kee ndó táto'on ki'o kée yu'u, chi yu'u kúú na kée táto'on ki'o kée Cristo.

Ki'o di'a kee ndó tá nátaaka ndo dákuá'a ndó to'on Ndios

² Nákonini yu'u ndo'ó, ñani, dá chi ndíko'on ini ndo yu'u, ta kée ndó táto'on ki'o ni daná'i noo ndo. ³ Tído kónii ña kían kandaá ini ndo ña Cristo kúú diní noo ndidaá kúú taa. Ta dión ta'ani ndó'o taa, chi mií rá kúú diní noo ñadi'í ra, ta Ndios kúú diní noo Cristo. ⁴ Sa'á ñoó ndi ndáa mií vá taa ká'an xí'ín Ndios o dána'a ra to'on ni xi'o Ndios noo rá tá kánóo iin ña'a diní rá, dá kían ko xí'o ta'on ra ñañó'ó noo na kúú diní noo rá. ⁵ Tído ndi ndáa mií vá ña ñá'a ká'an xí'ín Ndios o dána'a na to'on ni xi'o Ndios noo ná tá ko dáda'i na diní ná, dá kían ko xí'o ta'on na ñañó'ó noo ra kúú diní noo ná, ta kéeá kuendá táto'on ni datá tá'í diní ná. ⁶ Chi tá ko kóni na ñá'a dáda'i na diní ná, dá kían va'a kaan ná datá tá'í naan. Tído tá kían iin ña ka'an noo noo ná, dá kían va'a kaan ná dáda'i naan. ⁷ Ta ni iin taa ko kánian dáda'i diní rá, dá chi káa ra táto'on ki'o káa mií Ndios, ta nátiin na ñañó'ó noo rá. Tído ta taa kúú ra nátiin ñañó'ó noo na ñá'a, ⁸ dá chi ko ní kí'in Ndios lásá yika na ñá'a, dá kava'a na taa, di'a lásá yika taa ni ki'in na, dá ni kava'a na ñá'a. ⁹ Ta ko ní kava'a Ndios taa sa'á na ñá'a, di'a ni kava'a na ñá'a sa'á taa, dá chindeé ñaá. ¹⁰ Sa'á ñoó miían ndúsa kánian kada'i diní na ñá'a, dá ná'a na ña nákaa na tixi ndá'a yíi ná, chi ndé'é káxí ñaá ángel ndéi induú. ¹¹ Tído mií sato'o yo Ndios kúú na ni saki ña o kúu ta'on koo iin taa tá koó iin ñá'a, ta o kúu ta'on koo iin ñá'a tá koó iin taa, ¹² dá chi va'ará ni ki'in Ndios lásá yika taa, dá ni kava'a na ñá'a, tído tixi na ñá'a ta'ani káki taa. Tído ndidaá ña yó'o vei noo Ndios.

¹³ Sa'á ñoó nakani va'a ini mií ndó, ¿á ña va'a kían ña kanonó diní na ñá'a tá ká'an na xí'ín Ndios o koó? ¹⁴ Ta ná'a yó ña iin ña ka'an noo kían ña konó iin taa kua'ano nání idí diní rá. ¹⁵ Tído ña va'a va kían ña konó na ñá'a kua'ano nání idí diní ná, dá chi iin ñañó'ó vá kían, dá chi ni ni'i

ná idí diní ná ña kakuuan ña dáda'i diní ná. ¹⁶ Tído tá ká'án ndó kana'á ndó sa'a ña yó'o, dá kían kánian kana'á ndó ña kọ ta'ón iin ka ña'a ná'á ndu'u kee ndu xí'ín dao ka na kúú kuendá Ndios, sava'a ña yó'o va kían kée ndu.

Dánani Pablo ñayuu sa'á ña kọ vá'a kée na tá kua'an na kee na Santa Cena

¹⁷ Tído ña ko'in ka'in xí'ín ndó viti, kọ kían ña ká'an va'i sa'a ndo, chí noo náataka ndo dákuá'a ndó kánian dákuá'ano tá'an ndó, ta viti di'a dátúú tá'an ndó. ¹⁸ Ña mií noo ká'in xí'ín ndó kían ni ni'i tó'in ña noo náataka ndo dákuá'a ndó, daá kuití vá taó xóo tá'an ndó. Ta kándísai ña miían ndaa dión kée ndó. ¹⁹ Dá chí kị'o dión kánian taó xóo tá'an ndó, ká'án ndó, dá kándaá ini ndo ndá yoo kúú na miían ndaa ndíta ndaa xí'ín ña dákuá'a na. ²⁰ Chí tá náataka ndo sádíni ndó táto'on kị'o ni chindú'u sato'o yo Jesús, kọ kéndúsá'ano ndóan. ²¹ Dá chí noo seí ndoán, chíndaa noo dao ndó seí ndo ña né'e mií ndó ni kasáa ndo, ta kọ ndáti ndó ña ka'anda naán. Sa'á ñoó dao ka ndo kándoo nda'í kuíko, ta dao ka ndo xíni. ²² ¿Ndiva'a kée ndó dión? ¿Á kọ ta'ón ve'e ndó kasá'an ndó, ta ko'o ndó? ¿Ndiva'a kénóo ndó ve'e ño'o Ndios, ta kándaá ndo ñañó'ó na nda'í koó ña'a né'e ni kasáa? ¿Ndi kaai xí'ín ndó viti? ¿Á nakoni yu'u ndo'ó ña va'a kée ndó, ká'án ndó? Koó, chí kọ vá'a ta'on kée ndó.

Kị'o di'a níyiká yó kee yó tá kua'a keeá Santa Cena

²³ Chí táto'on ni natiin yu'u choon noo sato'o yo Jesús, kị'o dión sa ni daná'i noo ndo: Mií sakuaá ni nakị'o iin ta sato'o yo Jesús noo ndá'a ta né'e choon, dá ni tiin na pan. ²⁴ Dá tá ni ndi'i ni nakị'o na ndivé'e noo Ndios, dá ni sa'anda dao naán, dá ni kaa na: “Tiin ndó pan yó'o, ta keí ndoán, dá chí ña yó'o kúú yikí koñoi, ña kían nakị'oi kuu sa'a ndo. Ta daá kee ndó ña yó'o, dá ndiko'on ini ndo sa'á ña ni keei.” ²⁵ Ta dión ta'ani ni kee na tá ni tiin na copa vino noo ni ndi'i ni sasá'an na, dá ni kaa na: “Ndúta ño'o ini copa yó'o dáxinkoo ña saá ni kandoo Ndios kee na xí'ín ñayuu na, ta xinkooan xí'ín ni yú'u. Ta kị'o dión kee ndó iin rá iin ta'ándá xí'i ndó ra, dá ndiko'on ini ndo sa'á ña ni keei.” ²⁶ Sa'á ñoó tá seí ndo pan yó'o, ta xí'i ndó vino yó'o, náchina'á ndó ñayuu ña ni xí'i sato'o yo Jesús sa'á kuachi yo. Ta dión kee ndó nda ná kasandaá kuu nandió koo na kasaa na.

Ndó'o níó ñayuu ñoó sa'á ña kọ seí na pan ñoó, ta kọ xí'i na ndúta uva ñoó xí'ín ñañó'ó

²⁷ Sa'á ñoó ndi ndaa miíó ñayuu seí pan yó'o, ta xí'i na ndúta yó'o, ta kọ kée naan xí'ín ñañó'ó, dá kían kandoo na ndío na kuachi sa'á ña xini xíxi na yikí koño sato'o yo Jesús xí'ín ni ná. ²⁸ Sa'á ñoó miían ndúsa

kánian korndodó va'a ndó nío ndo, nde'á á ndíta ndaa ndo, dá keí ndo pan yó'o, ta ko'o ndó ndúta ñó'o ini copa. ²⁹ Dá chi na seí pan ñoó, ta na xí'i ndutá uva ñoó, ta ko kée naan xí'ín ñañó'ó, ta ko kékuendá na ña kían yikí koño sato'o yo Jesús, dá kían ndo'o nío ná kee Ndios. ³⁰ Ta sa'á ña kée ndó dión, sa'á ñoó kua'á nda'o ndó kú'u, ta kua'a ta'ani ndó kuitá, ta kua'a ndo sa ni xi'i. ³¹ Chi tá dinnó'ó taó yo kuendá ña vii káa nío yo, dá kían ná o dándó'o ta'on Ndios nío yo. ³² Tído kényiko Ndios sa'a yo, ta dándó'o na nío yo viti, dá kían ná dá'a ni tanda'á ná yó ko'o naá yó noo kánian ko'on na kúu kuendá ñayuu yó'o.

³³ Sa'á ñoó, ñani mií, tá ni nataka ndo keí ndo pan, ta ko'o ndó ndutá uva, koo ini ndo kandati tá'an ndó, dá kasá'an ndó. ³⁴ Tá ió iin káa ndó kuíko, dá kían va'a ka ve'e ndó kasá'an ndó, dá kían ná dá'a ka ni ya'a ndó noo nataka ndo, dá ná o dándó'o Ndios nío ndo. Ta ió dao ka ña'a ka'in xí'ín ndó, ta ñoó kían ndeyíkoj tá ná saaj noo ndéi ndó.

Ká'an Pablo sa'á ña xí'o oon Espíritu ij Ndios noo iin rá iin yó, dá katí'a yó kechóon yó noo ná

12 ¹ Kóni yu'u, ñani, ña kandaá ini ndo sa'a choon ni xi'o Espíritu ij Ndios noo yo, dá katí'a yó kechóon yó noo ná. ² Ta sa ná'á va'a mií ndó ña tá ni sa kuu ndó ñayuu ko ní sá na'á Ndios takí, sa xionoo ndava'a ndó sa kee yoko, ña ko tí'a ká'an. ³ Tído kónij ña kandaá ini ndo ña ni iin tó'ón ñayuu kómí Espíritu ij Ndios o kúu ta'on dátaí chi'an na Jesús. Ta ni iin tó'ón ñayuu o kúu ka'an ña Jesús kúu sato'o na tá ko kómí ná Espíritu ij Ndios.

⁴ Ta viti, kua'á nda'o kúu noo choon nátiin yó, dá katí'a yó kechóon yó noo Ndios, tído iin tó'ón dinj vá kúu Espíritu ij Ndios, na xí'o ndidaáán. ⁵ Chi kua'á nda'o noo choon ió kéchóon yó noo Ndios, tído iin tó'ón dinj vá kúu sato'o yo, na dándáki sa'án. ⁶ Ta kua'á nda'o noo choon ió kée yó, tído Ndios, na xí'o ña noo ndidaá yó, iin tó'ón vá kúu ná. ⁷ Ta noo iin rá iin yó xí'o Espíritu ij Ndios choon, dá katí'a yó dákuá'ano tá'an yó. ⁸ Chi noo dao ñayuu xí'o Espíritu ij Ndios to'on ndichí ka'an na, ta dao ka na ní'i ña ka'an na sa'á ña ná'á mií Ndios kée na kúu Espíritu ij. ⁹ Ta dao ka na ní'i ña kandeé ká'ano ini na Ndios kée mií Espíritu ij, ta dao ka na ní'i choon ña nduva'a na ñayuu kú'u kée Espíritu ij. ¹⁰ Ta noo dao ka ñayuu xí'o na ña kee na ña'a ndato, ta dao ka na ní'i ña kast'on na sa'á to'on ni ní'i ná noo mií Ndios. Ta dao ka na ní'i ña kandaá ini na ndá yoo kómí Espíritu ij, ta ndá yoo kómí espíritu to'ón. Ta dao ka na ní'i ña ka'an na dao ka yú'u, ña ko ní dákuá'a na. Ta dao ka na ní'i ña katí'a na nandió né'e na yú'u ká'an ñayuu ñoó. ¹¹ Ta ndidaá ña yó'o kée iin tó'ón dinj mií Espíritu ij Ndios. Ta xí'o na ña noo iin rá iin ñayuu táto'on kí'o ni chikaa ini mií ná kí'o naan.

Iin tó'on vá kúú yó sa'á ña kúú yó kuendá Jesús

¹² Iin tó'on vá kúú yikí koño yo, va'ará kua'á nda'o tá'í kíán. Ta ndidaá tá'í ñoó, va'ará kua'á nda'o kíán, iin tó'on yikí koño kíán. Ta ki'o dión ta'ani ndó'o yó sa'á ña kúú yó kuendá Cristo, ¹³ chi xí'ín iin tó'on vá Espíritu ii Ndios ni sodo ndúta ndidaá yó, dá ni nduu yó iin tó'on, va'ará dao yó kúú na Israel, ta dao ka yó kúú na ko kúú na Israel, ta dao yó kúú na ñó'o tixi ndá'a iin sato'o, ta dao ka yó kúú na koó sato'o. Tído iin tó'on dini vá kúú Espíritu ni natiin yó.

¹⁴ Ta dión ta'ani ndó'o yó xí'ín yikí koño yo, chi ko kíán iin tó'on tá'í, kua'a vá tá'í kíán. ¹⁵ Dá chi tá ná kaa sa'a yo: "Sa'á ña ko kúú yu'u iin ndá'a, sa'á ñoó ko kúú ta'on yu'u kuendá yikí koño yó'o", ía ña yó'o kóni kaa ña ko kíán kuendá yikí koño yo? Koó, dá chi ñaá vá kíán. ¹⁶ Ta tá ná kaa do'o yó: "Sa'á ña ko kúú yu'u iin nduchí nóó, sa'á ñoó ko kúú ta'on yu'u kuendá yikí koño yó'o", ía ña yó'o kóni kaa ña ko kíán kuendá yikí koño yo? Koó, dá chi ñaá vá kíán. ¹⁷ Sa'á ñoó tá iin ní yikí koño yo ná kakuu nduchí nóó, dá kíán, ¿ndi koo kueídó'o yó, tá dáá? Ta tá iin ní yikí koño yo ná kakuu do'o yó, dá kíán, ¿ndi koo ta'ami yó ña'a? ¹⁸ Tído mií Ndios kúú na ni chirndaa iin rá iin tá'í yikí koño yo noo kánian karndaaan táto'on ki'o ni koni mií ná. ¹⁹ Dá chi tá iin tó'on tá'í ndá'a ná kakuu iin ní yó, ¿ndeí kakuu yikí koño yo, tá dáá? ²⁰ Tído viti, va'ará kua'á nda'o tá'í kúú yikí koño yo, tído iin tó'on dini vá ñayuu kúú yó.

²¹ Ta o kúú ta'on ka'an nduchí nóó yo xí'ín ndá'a yo: "Ko ta'on choon kuui ndo'ó." Ta ni dini yo, o kúú ta'on ka'an xí'ín sa'a yo: "Ko ta'on choon kuui ndo'ó." ²² Tído tá'í yikí koño yo, ña ká'an yó ña ko ndáya'i, ñoó di'a xínñó'ó cháa ka yikí koño yo. ²³ Ta dao tá'í yikí koño yo, ña ko ndáya'i noo yo, ñoó di'a kíán dándixi va'a yó. Ta dión ta'ani kée yó xí'ín tá'í yikí koño yo, ña kedaá xí'á, dá xíka'an noo yo, ñoó di'a kíán dáda'i yó xí'ín ñañó'ó. ²⁴ Ta ko kánian dáda'i yó ñi yo noo va'a ná'a. Ta mií Ndios ni ndeyíko na yikí koño yo, dá natiin ña koó ñañó'ó yó noo, cháa ka ñañó'ó. ²⁵ Ta dión ni kee na, dá kíán ná dá'a ni kañó'ó tá'an tá'í yikí koño yo, di'a ná ku'u inian sa'a sátá'an. ²⁶ Sa'á ñoó tá tárku'e iin tá'í yikí koño yo, ta kúú iin ní vá ñi yo u'u. Ta tá ió iin tá'í yikí koño yo va'a ndó'o, ta kúú iin ní vá ñi yo va'a ndó'o, ta kadii inian.

²⁷ Ta ndo'ó kúú táto'on yikí koño Cristo, ta iin rá iin ndó kúú táto'on tá'í yikí koño na. ²⁸ Ta dao ndó ni chikata Ndios ña kee ndó choon noo na kúú kuendá Jesús. Ta choon mií noo ni xi'o na kúú ña dao yó kakuu apóstol, dá kane'e yó to'on na, ta dao ka yó kakuu profeta, dá kasto'on yó to'on ni natiin yó noo mií Ndios. Ta choon kúú oni ni ni'í tá'í dao ka yó kakuu yó na dána'a. Ni ndi'i, dá ni ni'í tá'í dao ka yó choon ña kandeé yó kee yó ña'a ndato. Ndi'i, dá ni ni'í tá'í dao ka yó choon ña nduva'a yó na kú'u. Ta dao ka yó ni ni'í tá'í ña chindeé yó ñayuu

kúnda'í. Ta dao ka yó ni ni'i tá'i ña kakuu yó na ka'anda choon noó na kúu kuendá Cristo. Ta dao ka yó ni ni'i tá'i ña ka'an yo dao ka yú'u, ña ko ní dákuá'a yó. ²⁹ Sa'a ñoó, ¿á ndidaá yó kúu apóstol? ¿Á ndidaá yó kúu profeta? ¿Á ndidaá yó kúu na dána'a? Ta, ¿á ndidaá yó kándéé kée ña'a ndato? ³⁰ Ta, ¿á ndidaá yó ni ni'i tá'i ña nduva'a yó na kú'u? Ta, ¿á ndidaá yó ni ni'i tá'i ña ka'an yo dao ka yú'u, ña ko ní dákuá'a yó? Ta, ¿á ndidaá yó ni ni'i tá'i ña nandió né'e yó to'on ni ka'an iin na ni ka'an iin ka yú'u? Koó, ko ta'ón dión kíán. ³¹ Sa'a ñoó ndi'i ini ndo ni'i ndo choon ndáya'i cháá ka noo Ndios. Tído viti ko'in dána'i noo ndo iin íchi va'a cháá ka.

Ká'an Pablo ndi kee yó, dá ku'u ini yo sa'a dao ka ñayuu

13 ¹ Va'ará kát'i'a yu'u ká'in dao ka yú'u, ña ká'an na ndéi ñayuu yó'o o ña ká'an ángel ndéi induú, tído tá ko kú'u ini sa'a ñayuu xi'ín, dá kíán kúu'í táto'on iin kaa kásá oon, o kaa chíin kádí oon. ² Ta va'ará ná natiin yu'u to'on ni kii noo Ndios, ta va'ará ndidaa ka vían ná kana'í ña ndichí ió de'é, ta va'ará ndidaa ka vían ná kana'í ndidaá kúu ña ndichí ió ñayuu yó'o, ta va'ará kandeé ká'ano ini Ndios, ña kandeéi nadaoin yúku kaa nakuiian iin ka xían, tído tá ko kú'u ini sa'a ñayuu xi'ín, dá kíán ni iin ña'a ko kúu'í. ³ Ta va'ará ná dasái ndidaá kúu ña'a ió noo'í noó na kúnda'í, ta va'ará ná ki'oi yikí koñoi ña kei ña, tído tá ko kú'u ini sa'a ñayuu xi'ín, dá kíán ni iin ña'a ko ndáya'i va ña ni keei.

⁴ Ña kú'u ini yo sa'a ñayuu xi'ín yó kíán ña ki'o ndeé ini yo sa'a ná, ta va'a koo ini yo xi'ín ná. Ta ña kú'u ini yo sa'a ñayuu xi'ín yó ko kúu ta'an vaan ña koo u'u ini yo koni yo ná, ta ña kú'u ini yo sa'a ná ko kúu ta'an vaan ña kuvatá yó noo ná, ta ni ko kíán ña kuryí yó noo ná, ⁵ ta ni ko kíán ña kexíxi yó xi'ín ná, ta ni ko kíán ña koo dí'inda ini yo, ta ni ko kíán ña karyí yó xi'ín ná, ta ni ko kíán ña kaño'o u'u ini yo koni yo ná, ⁶ ta ni ko kíán ña kadii iní yo tá kée na ña kini, chi kíán ña kadii di'a ini yo tá kée na ña ndaa. ⁷ Ta sa'a ña kú'u ini yo sa'a ñayuu xi'ín yó, sa'a ñoó ki'o ndeé iní yo sa'a ndidaá ña'a kée na xí'á, ta noo ndidaá ña'a kandeé iní yo ná, ta noo ndidaá ña'a kandati yó na, ta noo ndidaá ña'a ndeé koo ini yo sa'a ná.

⁸ Ta ña kú'u ini yo sa'a dao ka ñayuu, ni iin kuu ta'ón o ndí'an. Tído iin kuu ndi'i va ña kásto'on ñayuu to'on ni natiin na noo Ndios, ta ndi'i ta'ani ña ká'an na dao ka yú'u, ña ko ní dákuá'a na. Ta ndi'i ta'ani ña ndichí ná'á ná. ⁹ Chi ná'á ni'ini va yó cháá ña'a Ndios, ta sav'a cháá to'on ni natiin yó noo ná, ki'o dión dána'a yo. ¹⁰ Tído tá ná kasandaá kuu koo ndidaá ña'a táto'on ki'o kóni Ndios kooan, dá kíán ndi'i va ndidaá ña kéchóon too yó viti.

¹¹ Tá ni sa kuu yu'u iin tayíí ló'o, dá sa ka'in táto'on ká'an xi, ta sa nakani ini táto'on ki'o nákanini ini xi, ta sa ndo'i táto'on ki'o ndó'o xi.

Tído tá nī kasandaái kúúí iin ta yatá, dá nī dankooi ña kée iin tayíí ló'ó.
¹² Chī ña ndó'o yó viti kíán táto'on kī'o ndó'o yó tá ndé'é yó noo iin espejo ko ná'a va'a, chī cháá vá ña'a ná'a yó viti. Tído kasandaá iin kuu, dá koni xí'ín noo yo Ndios. Ta viti kíán cháá vá ná'a yó sa'a ná, tído nda daá ví, dá kana'á va'a yó Ndios táto'on kī'o ná'a mií ná yó. ¹³ Ta viti, daá ná koo ini yo kandeé iní yo Ndios, ta daá kuití ná kandati yó na xí'ín tandeé iní, ta daá kuití ná ku'u ini yo sa'a ñayuu xí'ín yó. Tído ña ndáya'i cháá ka noo ndin oni ña yó'o kíán ku'u ini yo sa'a ñayuu xí'ín yó.

Di'a kee ndó tá nī natiin ndó noo Ndios ña kati'a ndó ka'an ndó iin yú'u ko ní dákuá'a ndó

14 ¹ Sa'a ñoo koo ini ndo ku'u ini ndo sa'a ñayuu xí'ín ndó. Ta ndukú ndó ña kakomí ndó choon, ña kíán xí'o Espíritu i Ndios noo ndo, dá kati'a ndó kechóon ndó noo ná. Tído katoó cháá ka ndo choon ña kíán kásto'on ndó xí'ín ñayuu to'on nátiin ndó noo mií Ndios. ² Dá chī ñayuu ká'an iin yú'u ko ní dákuá'a na, ko ká'an ta'on na xí'ín dao ka ñayuu, sava'a xí'ín Ndios vá ká'an na, dá chī ko kándaá ini dao ka ñayuu ña ká'an na, chī kíán iin ña'a ko kátóni ini yo nī xí'o mií Espíritu i Ndios noo ná. ³ Tído tá'an ñayuu kásto'on to'on nī natiin na noo Ndios xí'ín dao ka ñayuu, na yó'o kúú na xí'o ña kua'ano cháá ka ñayuu xí'ín to'on Ndios, ta ká'an ni'ini na noo ná, ta xí'o ñaá ná tandeé iní. ⁴ Chī na ká'an iin ka yú'u ko ní dákuá'a na, noón kúú na dákuá'ano mií vá ná. Tído na kásto'on xí'ín ñayuu to'on nī natiin na noo mií Ndios, na yó'o kúú na dákuá'ano ndidaá ñayuu kuendá Jesús xí'ín to'on Ndios. ⁵ Kóni yu'u ña kíán ndidaá ndó ka'an iin yú'u ko ní dákuá'a ndó, tído va'a cháá ka ví kíán tá ná kásto'on ndó to'on nī natiin ndó noo mií Ndios xí'ín ñayuu. Dá chī va'a cháá ka kée na kásto'on to'on nī natiin na noo Ndios o duú ka na ká'an iin ka yú'u. Tído tá ió dao na nī natiin ña kándaá ini na ndi kóni kaa yú'u ká'an na ñoo, dá kíán kua'ano ñayuu kuendá Jesús xí'ín to'on Ndios.

⁶ Sa'a ñoo, ñani, tá ná saa yu'u noo ndéi ndó xaan, ta kasá'í ka'in xí'ín ndó iin yú'u ko kándaá ini ndo, ¿ndí kíán va'a ni'i ndo, tá dáá? Tído tá ná ka'in xí'ín ndó sa'a iin to'on sa'a nī xí'o Ndios noo, o sa'a iin to'on ndichí nī nī'í noo ná, o sa'a iin to'on nī natiin noo ná, o sa'a iin ka to'on ndaa, dá kíán kándaá ini ndo. ⁷ Miían ndaa ko náki'in tá'an nóo ta'on noo ká'an yír tuú xí'ín yír dáká'a ra. Tído tá ko ká'a rá táto'on kī'o kánian ka'a rá, dá kíán, ¿ndi kee yó kándaá ini yo ndá yaa tuú na, o ndá yaa dáká'a na? ⁸ Ta tá ná o tuú ndísá'ano ra iin trompeta, dá kíán, ¿ndi koo kándaá ini soldado ña kánian kenduu ra mií rá ko'on ra naá ra? ⁹ Ta kī'o dión ta'ani ndó'o ndo'ó tá ká'an ndo iin yú'u ko kándaá ini dao ka ñayuu. ¿Ndi kee na kándaá ini na ña ká'an ndo? Ta noo táchi vá ká'an ndo. ¹⁰ Kua'á nda'o yú'u ká'an ñayuu ndéi ñayuu yó'o, ta iin rá iin

ñayuu kánda*a* ini yú'u ká'an n*a*. ¹¹ Tído tá k*o* kánda*a* ini yu'u yú'u ká'an dao k*a* ñayuu, dá k*ian* iin t*a* t*ukú* vá kúú yu'u no*o* ná. Ta dión ta'ani iin n*a* t*ukú* vá kúú ná no*o* yú'u. ¹² Sa'á ño*o* ndo'ó, n*a* kátoó kakomí choon xí'o Espíritu i*i* Ndios, ndi'i cháá k*a* ini ndo kakomí ndó choon dákuá'ano ndó dao k*a* n*a* kúú kuendá Jesús xí'ín to'on Ndios.

¹³ Sa'á ño*o* ndi ndáa ndó ká'an iin k*a* yú'u ñ*a* k*ian* k*o* ní dákuá'a ndó, dá k*ian* kaka ndo no*o* Ndios ñ*a* ná k*i*'o na ñ*a* kati'a ndó nandió né'e ndó ndi kóni kaa yú'u ká'an ndo. ¹⁴ Dá ch*i* tá ká'an yu'u xí'ín Ndios xí'ín iin k*a* yú'u k*o* kánda*a* ini, dá k*ian* mián ndaa ká'in xí'ín ná xí'ín espírituí, tído ñ*a* yó'o k*o* chíndeéán ñaxintóni*i*. ¹⁵ ¿Ndá k*ian* kee yu'u, tá dáá? Kánian ka'in xí'ín Ndios xí'ín espírituí, tído káni ta'anian ka'in xí'ín ná xí'ín ñaxintóni*i*. Kánian katai xí'ín espírituí, tído káni ta'anian katai xí'ín ñaxintóni*i*. ¹⁶ Ch*i* tá kéká'ano ndó Ndios xí'ín sava'a espíritu ní ndó, ta nákaa iin n*a* k*o* kánda*a* ini to'on ká'an ndo, dá k*ian*, ¿ndi kee na kaa n*a*: “Dión ná koo”, sa'á ndivé'e n*i* nak*i*'o ndó no*o* Ndios? Ch*i* k*o* ní kánda*a* ini n*a* ndí k*ian* n*i* ka'an ndo. ¹⁷ Ch*i* mián ndaa kuiti va'a n*i* kee ndó n*i* nak*i*'o ndó ndivé'e no*o* Ndios, tído k*o* ní sá'ano dao k*a* ñayuu xí'ín to'on Ndios, ch*i* k*o* ní kánda*a* ini n*a*. ¹⁸ Náki'o yu'u ndivé'e no*o* Ndios, dá ch*i* ká'an cháá k*a*i dao k*a* yú'u, ñ*a* k*o* ní dákuá'i, o duú ndidaá k*a* ndo'ó. ¹⁹ Tído tá nákaa*i* ini ve'e no*o* náta*a* ndo, dá k*ian* kátoó cháá k*a*i ká'in va'ará o'on káa to'on, ñ*a* k*ian* kánda*a* ini, dá dána'i no*o* ndo, o duú ñ*a* ka'in ux*i* mil to'on xí'ín iin yú'u, ñ*a* k*o* kánda*a* ini ñayuu.

²⁰ Ñani mi*i*, o sa kákuu ñaxintóni ndo ñaxintóni takuáli leé. Va'a kaan takuáli kakuu ndó, tído no*o* kuachi va, dá ch*i* k*o* ná'á xí sa'á kuachi kini. N*a* yata kakuu ndó no*o* ñ*a* ná*kani* ini ndo sa'á ñ*a*'a Ndios. ²¹ Dá ch*i* k*i*'o di'a kaá tuti i*i* Ndios: “Ka'in xí'ín n*a* ñoo*i* xí'ín yú'u n*a* t*ukú*, xí'ín iin yú'u k*o* ná'á ná. Ta va'ará xí'an dión ná keei, o kékuendá ta'on na ñ*a* ka'in xí'ín ná, kaá sato'o yo Ndios.” ²² Sa'á ño*o*, tá ká'an ndo iin k*a* yú'u, ñ*a* k*o* ní dákuá'a ndó, ño*o* k*ian* ná'a no*o* ñayuu k*o* kándisa ñ*a* ió Ndios xí'ín ndó, tído k*o* chíndeéán ñayuu sa kándisa. Tído tá kásto'on ndó xí'ín ñayuu to'on n*i* natiin ndó no*o* mi*i* Ndios, ñ*a* yó'o k*ian* chíndeé cháá k*a* ñayuu kándisa o duú n*a* k*o* kándisa.

²³ Sa'á ño*o* tá n*i* nditútí ndidaá ndó ini ve'e no*o* náta*a* ndo, ta ndéi ndó ká'an ndo iin yú'u k*o* ní dákuá'a ndó, ta n*i* kasá*a* iin n*a* kátoó kueídó'o to'on Ndios o iin n*a* k*o* kándisa, dá kaa n*a* xí'ín ndó ñ*a* lóko va kúú ndó. ²⁴ Tído tá ndidaá ndó n*i* kasá'á kásto'on to'on n*i* natiin ndó no*o* mi*i* Ndios, ta n*i* kasá*a* iin n*a* k*o* kándisa o iin n*a* kátoó kueídó'o to'on Ndios, ta kúú to'on yó'o kedaá xí'ín ná, ta kanda*a* ini n*a* ñ*a* kómí ná kuachi, dá kasá'á nakani ini n*a* ñ*a* k*o* vá'a kée na. ²⁵ Dá k*ian* nono nda maá ini ní*o* ná kanda*a* ini n*a* ñ*a* k*o* vá'a kée na, dá taxí tá'an na nakuita xítí ná no*o* Ndios, ta keká'ano ñ*a*á ná. Ta kaa n*a* xí'ín ndó: “Mián ndaa kuiti ió Ndios xí'ín ndó.”

Koo ini ndo ña ndidaá ña'a kee ndó ná dákuá'anoan ndo íchi Ndios

²⁶ ¿Ndi koo kee yó viti, tá dáá, ñani? Tá ni nditútí ndó ini ve'e noo náataka ndo, dá keká'ano dao ndó Ndios xí'ín iin yaa, ta dao ka ndo dána'a to'on Ndios, ta dao ka ndo ka'an iin to'on saá ni natiin ndó noo mií Ndios, ta dao ka ndo ka'an yú'u ko ní dákuá'a ndó, ta dao ka ndo nandió né'e ndi kóni kaa yú'u ni ka'an dao na. Tído koo ini ndo kenda ndo ndidaá ña yó'o, dá ná kua'ano dao ka ndo íchi Ndios. ²⁷ Tá kua'an ndo ka'an ndo iin yú'u ko ní dákuá'a ndó, dá kían sava'a uu ndo, o oni ndo ka'an. Tído iin rá iin ni ndó ka'an. Ta kánian koo iin na ti'a nandió né'e ndi kóni kaa to'on ni ka'an ndo. ²⁸ Tído tá ko íin ti'a nandió né'e yú'u ni ka'an ndo, dá kían ná dá'a ni nakuíta ndó ka'an ndoán. Va'a kaan ndató'ón kayá ni ndó xí'ín Ndios. ²⁹ Ta dión ta'ani ná kee na kua'an kasto'on to'on ni natiin na noo mií Ndios ini ve'e noo náataka ndo. Sava'a uu na, o oni na ná ka'an. Ta dao ka ndo kandeí ta'í iní sa'á to'on ni ka'an na. ³⁰ Tído tá ni natiin iin na ió seídó'o iin to'on saá noo Ndios, dá kían ná katuu tóo na íin ká'an, dá kuu ka'an na sa'á to'on saá ni natiin na. ³¹ Iin rá iin ni ndó ya'a kasto'on to'on ni natiin ndó noo mií Ndios, dá kían ndidaá ndó kandaá cháá ka ini ndi kían kóni Ndios, dá koo cháá ka tandeé iní ndo xí'ín ná. ³² Chi iin na ni natiin to'on noo mií Ndios kasto'on na, ió choon noo ndá'a ná ña katuu tóo na noo ká'an na, ³³ dá chi Ndios, na ndáño'o yó, ko kúu ta'on na iin Ndios xí'o ña nakuina vaa yo. Di'a xí'o na ña kandeí yó xí'ín ñañó'ó.

Táto'on ki'o kée dao ka na kúu ñayuu Ndios ini ve'e noo dákuá'a na, ³⁴ kánian tádi kandeí na ñá'a ve'e noo náataka ndo dákuá'a ndó, chi ko ta'ón íchi ná ndató'ón ná. Di'a kánian kaño'o na tixi ndá'a yíi ná táto'on ki'o sa'ándá ley Ndios choon. ³⁵ Tá ndáa ña'a ko ní kandaá ini na, dá kían tá ná nasaa na ve'e na, dá ná ndató'ón ná yíi ná. Dá chi iin ña ka'an noo kían ña ndató'ón ná ini ve'e noo náataka ndo dákuá'a ndó. ³⁶ ¿Á sava'a noo ndo'ó ni nato'on to'on Ndios, xiní ndo? O, ¿á sava'a noo ndo'ó ní ni kasáaan, ká'án ndó?

³⁷ Tá ió iin káa ndó ká'án ña kúu ndó na ni natiin to'on noo mií Ndios, o ká'án ndó ña kómí ndó iin choon ni xi'o Espíritu i Ndios noo ndo, dá kían kánian nakoni ndo ña choon táai noo tuti yó'o kúu choon sa'ándá Ndios, na kúu sato'o yo. ³⁸ Tá ió iin káa ndó ko nákoní ña dión kían, dá kían ná dá'a ni nakoni ndo ná. ³⁹ Sa'á ñoó, ñani, ndi'i ini ndo natiin ndó choon ña kasto'on ndó to'on ni ni'i ndo noo mií Ndios. Ta o sa chítuu ndó dao ka na ña ka'an na iin ka yú'u ko ní dákuá'a na, ⁴⁰ tído kee ndó ndidaá ña yó'o xí'ín ñañó'ó, ta yíko kee ndó ña.

Ká'an Pablo sa'a ndi koo tá ná nataki na ni xi'i

15 ¹ Ñani miíi, ko'in kasto'in xí'ín ndó sa'á to'on va'a sa'a Jesucristo, tá'an ña sa ni daná'i noo ndo, tá'an ña ni natiin

ndó, ta ndíta toon ndó xí'án. ² Tá ná kandita toon ndó xí'ín mií to'on va'a yó'o, ña ni daná'i noo ndo, dá kían ni'i ndo ña kaki ndó. Tá koó, dá kían ko chón ta'on ña kándisa ndó.

³ Chi ña mií noó ni daná'i noo ndo kúu to'on ni xi'o mií Ndios nooí, chi ni daná'i noo ndo ña ni xi'i Cristo Jesús sa'a kuachi yó, tá ki'o dión, dá ni xinkoo noo ká'an tuti ii Ndios. ⁴ Dá ni nduxi na. Ta ni nataki na tixi kuu óni, dá ni xinkoo noo ká'an tuti ii Ndios. ⁵ Dá ni na'a noo ná noo Cefas. Ndi'i daá ni na'a noo ná noo ndin uxu uu taa ni sa xionoo xí'ín ná. ⁶ Tá ni ndi'i, dá ni na'a noo ná noo o'on ciento ka ñayuu kúu kuendá na. Ta kua'a íi vá na yó'o ndéi takí, tído dao na ni xi'i. ⁷ Tá ni ndi'i, dá ni na'a noo ná noo Jacobo. Ndi'i, dá ni na'a noo túku na noo ndidaá taa kúu apóstol, tá'an ra ni kaxi na kane'e to'on na. ⁸ Nda noo ndí'i kuií, dá ni na'a noo ta'ani na noo mií yu'u, sa'a ñoó kúu táto'on iin taló'o kuee ni kaki.

⁹ Ta kúu na nóo cháa ka noó ndidaá ka apóstol, ta ko káni vian ña kananí yu'u ña kakuui apóstol, chi sa xionoo yu'u sa kendava'i xí'ín na kúu kuendá Jesús. ¹⁰ Tído sa'a ña maní ni kee Ndios xí'ín, sa'a ñoó ni kee na yu'u kúu iin apóstol. Ta ña maní ni kee na xí'ín yu'u, ko ní naá óon ta'an vaan. Di'a kéchón cháa kai o duú ndidaá ka ni taa né'e to'on na. Tído o duú míi yu'u kéchón, mií vá Ndios kúu na chindee yu'u sa'a ña maní ni kee na xí'ín. ¹¹ Tído ko ta'ón ña'a kían á yu'u o dao ka na dána'a noo ndo. Chi sa'a ña yó'o dána'a ndi'i ndu, ta ña yó'o kían kándisa ndó.

¹² Ndu'u kúu na dána'a ña miían ndaa kuiti ni nataki Jesús tein na ni xi'i, sa'a ñoó, ¿ndiva'a ká'an dao ndó ña o nátaqi ta'on na ni xi'i? ¹³ Tído tá ná o nátaqi na ni xi'i, dá kían ni Cristo ko ní nátaqi, ní kúu. ¹⁴ Tído tá ko ní nátaqi Jesús, dá kían ko chón ta'on to'on ni daná'a ndu noo ndo, ta ni ña kándisa ndó sa'a Jesús ko chón, ní kúu. ¹⁵ Tá ki'o dión kían, dá kían ni kandoo ndu kúu ndú na ká'an to'on sa'a Ndios, dá chi xi'o ndu kuendá ña Ndios kúu na ni danátaqi Cristo. Tído ko ní nátaqi ta'on Cristo tá miían ndaa o nátaqi na ni xi'i, ní kúu. ¹⁶ Chi tá ná o nátaqi na ni xi'i, dá kían ni Cristo ko ní nátaqi ta'on, ní kúu. ¹⁷ Tá ko ní nátaqi Jesús, dá kían ko chón ta'on ña kándéé iní ndo ná, ta kómí ii vá ndo kuachi noo Ndios. ¹⁸ Tá dión kían, dá kían ni naá óon va na ni xi'i íchi Cristo. ¹⁹ Sa'a ñoó tá sava'a ñayuu yó'o va ió tandéé iní noo yo xí'ín Cristo, dá kían nda'í cháa ka ndó'o yó o duú ndidaá ka ñayuu ndéi ñayuu yó'o.

²⁰ Tído miían ndaa kuiti va ni nataki Cristo tein na ni xi'i, ta mií ná kúu na mií noó ni nataki, sa'a ñoó miían ndaa nataki ndidaá ka ñayuu ni xi'i. ²¹ Ta sa'a iin tó'on taa, sa'a ñoó ndidaá kúu ñayuu xí'i. Ta dión ta'ani sa'a iin ka taa nataki na ni xi'i. ²² Chi sa'a ña ni kee Adán kuachi, sa'a ñoó ndidaá ñayuu xí'i. Ta dión ta'ani, sa'a ña ni nataki Cristo, sa'a ñoó ndidaá ñayuu ni xi'i ni'í ña nataki na. ²³ Tído iin rá iin ña'a ió

yíkoan tátò'on kì'o nì chikaa ini Ndios kooan. Chì dinñó'ó Cristo nì nataki, dá tá ná nandió koo na kasaa na, dá ví nataki ñayuu kuendá na.

²⁴ Dá kasandaá kuu naá ñayuu yó'o, dá naki'o Cristo ndidaá kúu choon noo ndá'a tatá Ndios tá nì ndi'i nì kandeé ná nì dítá ná choon noo ndá'a ndidaá ña sa komí ndée, xí'ín ndidaá ra sa sa'anda choon xí'ín ndidaá ra sa dandáki ñayuu yó'o. ²⁵ Dá chì miñan kánian dándáki Cristo nda ná nataán ndi'i Ndios ta xiní u'u ñaá tixi sa'a ná. ²⁶ Dá nda noo ndí'i kuií, dá kían dánaá na ña xiní u'u ñaá, tá'an ña kédaá xí'ín yó, dá xí'i yo.

²⁷ Chì ndidaá vá ña'a nataán Ndios tixi sa'a Cristo. Tído tá kaáan ña ndidaá vá ña'a kaño'o tixi ndá'a ná, kò kóni kaaan ña kaka ta'ani mií Ndios, chì mií vá ná kúu na nì nataán ndidaá kúu ña'a tixi sa'a ná. ²⁸ Tá nì ndi'i nì ndu'u ndidaá kúu ña'a tixi ndá'a Cristo, dá ndu'u mií Cristo, na kúu de'e Ndios, tixi ndá'a mií Ndios, na nì naki'o ndidaá kúu ña'a tixi ndá'a ná. Dá kían mií Ndios kakuu na mií noo noo ndidaá ña'a.

²⁹ Ta viti, ¿ndiva'a sódo ndúta dao ndó sa'a ñayuu nì xi'i tá kò kándísa ndó ña nataki na nì xi'i? ¿Ndiva'a sódo ndúta ndo sa'a na nì xi'i, tá dáá?

³⁰ Ta, ¿ndiva'a daá kuití ndó'o nío ndu'u sa'a to'on Ndios tá ná o nátaki na nì xi'i, tá dáá? ³¹ Ká'an ndaaí xí'ín ndó, ñani, ña sa'a ña kádi ini yu'u sa'a ña nì kee sato'o yo Jesucristo xí'ín ndó, sa'a ñoó ndidaá kuu vá ió ña kuui. ³² Ta nì xió né'e tá'in xí'ín ta tondó ndéi ñoo Éfeso, tído, ¿ndí kían va'a ni'i yu'u tá dión ná o nátaki na nì xi'i? Dá chì tá ná o nátaki ñayuu nì xi'i, dá kían: “Ná kasá'an yó, ta ná ko'o yó, ta ná xinió, dá chì iin taan kuu va yó.”

³³ O sa kí'o ndó mií ndó ña danda'í na ndo'ó, dá chì: “Tá xionoo ndó xí'ín taan kini, dá kían dátuu vá rá ndo'ó noo ña va'a kée ndó.” ³⁴ Sa'a ñoó kánian ndito koo ini ndo, dá ná o yá'a ndó kee ndó kuachi noo Ndios. Chì ndéi dao ñayuu kò ná'a Ndios tein mií ndó xaan. Dión ká'an yu'u xí'ín ndó, dá ná kaka'an noo ndo.

Kì'o di'a koo, dá nataki na nì xi'i

³⁵ Ndá ndi kuu ndato'ón iin káa ndo'ó, ta kaa ndo: “¿Ndí koo, dá nataki ñayuu nì xi'i? ¿Ta ndi koo yikí koño kandixi na noo nataki na?”

³⁶ Ñayuu xixi kúu ndó. Chì tá chí'i ndó iin tata noño'o ndo, miñan ndúsa kánian kuaan tii ñó'o, dá dákuitaan kakuuan iin yuku saá. ³⁷ Ta ña chí'i ndó noño'o ndo kò kían sa iin yuku kuí, di'a dinñó'ó iin tata ichí kían chí'i ndó, miñan kían noni tirió o dao ka tata. ³⁸ Tído mií vá Ndios kúu na xí'o ndi koo iin rá iin yuku tátò'on nì chikaa ini mií ná kooan, sa'a ñoó iin rá iin tata xí'ín yukuán.

³⁹ Ta dión ta'ani o duú iin nóo kúu ndidaá yikí koño. Chì díin vá kúu yikí koño ñayuu, ta sa díin vá kúu yikí koño kirí kúu kítí. Ta sa díin vá kúu yikí koño tiyaká, ta sa díin vá kúu yikí koño kirí ió tomi. ⁴⁰ Ió yikí koño kómí na ndéi induú, ta díin vá kúu yikí koño kómí ñayuu ndéi noño'o yó'o. Chì ndato cháa ka yikí koño kómí na ndéi induú o duú yikí

koño kómí na ndéi noñó'o yó'o. ⁴¹ Ta dión ta'ani díin vá ndato ndiandii, ta díin vá ndato yoo. Ta díin vá ndato tiño. Ta díin vá ndato dao tiño noo dao ka ri.

⁴² Ta ki'o dión ta'ani ndo'o na ni xi'i tá ná natakí na, chi yikí koño na, ña ni nduxi, kían té'i. Tído tá ná natakí na, dá kían nani'i ná iin yikí koño, ña ni iin kuu o té'i. ⁴³ Chi yikí koño ni nduxi kúú iin yikí koño kañó'ó ñayuu. Tído tá ná natakían, dá nduuan iin ña'a ndato. Chi tá ni nduxian ni sa kían iin ña'a koó ndée. Tído tá ná natakían, dá nduuan iin ña'a ió ndée. ⁴⁴ Tá ni nduxian, dá ni sa kían iin yikí koño kómí na ndéi noñó'o yó'o. Tído tá ná natakían, dá nduuan iin yikí koño kómí na ndéi induú. Dá chi ió yikí koño kómí na ndéi noñó'o yó'o, ta ió ta'ani yikí koño kómí na ndéi induú.

⁴⁵ Chi ká'an tuti ii Ndios ña mií Ndios ni kava'a taa mií noó, tá'an ra sa naní Adán, ta ni xi'o na ña ni sa taki ra. Tído Cristo, na ni kii sata Adán, noón kúú iin Espiritu xí'o ña kataki chíchí yó. ⁴⁶ Tído ko ní ni'i yo yikí koño kuendá induú mií noó, di'a ni ni'i yo yikí koño kuendá noñó'o yó'o va. Ndi'i, dá ni'i yo yikí koño kuendá induú. ⁴⁷ Chi taa mií noó ni sa kuu kuendá noñó'o yó'o, chi ni kava'a ra xí'ín ñó'o. Tído taa kúú uu, na kúú sato'o yo, noón kúú kuendá induú, chi ni kii na chí induú. ⁴⁸ Dá chi táto'on ki'o kaa yikí koño sa komí taa ni kava'a xí'ín ñó'o, ki'o dión kúú yikí koño na kúú kuendá noñó'o yó'o. Ta yikí koño na kúú kuendá induú kúúan táto'on yikí koño na ni kii induú. ⁴⁹ Ta viti ndaa yikí koño yo táto'on ki'o ni sa kaa yikí koño taa ni sa kuu kuendá noñó'o yó'o. Tído kasandaá iin kuu, dá nduu yikí koño yo táto'on kaa yikí koño na ni kii chí induú. ⁵⁰ Sa'á ñoó ká'in xí'ín ndó, ñani mií, ña o kúu ta'on ndu'u koño yo xí'ín ni yo noo dándáki Ndios. Chi ña'a túú, o kúu ta'on natiian kuendá noó ña'a ko túú.

⁵¹ Ta viti kónii ka'in xí'ín ndó sa'a iin ña'a ná'á iin tó'ón mií Ndios. O duú ndidaá vá yó kuu, tído ndidaá vá yó ndesaá Ndios yikí koño, ⁵² chi iin ndakána va kakuuan, táto'on ki'o kée noo yo tá nákuani yo. Dión koo tá tuu trompeta noo ndi'i. Dá chi tá ni tuu trompeta, dá natakí na ni xi'i, ta ni'i ná iin yikí koño o té'i. Ta ndidaá yó, na ndéi takí, ndesaá Ndios yikí koño yo. ⁵³ Dá chi miían ndusa nadaon yikí koño té'i yó'o, dá kandixi yó iin yikí koño, ña ni iin kuu o té'i. Ta yikí koño yó'o, ña xí'i, kánian nadaon, dá kandixi yó iin yikí koño, ña kían ni iin kuu o kúú.

⁵⁴ Tá ni ndi'i ni nadaon yikí koño té'i yó'o, ta ni nandixi yó iin yikí koño ko té'i, ta tá ni ndi'i ni nadaon yikí koño yó'o, ña xí'i, ta ni nandixi yó iin yikí koño, ña ni iin kuu o kúú, dá xinkoo to'on ká'an tuti ii Ndios, chi di'a kaáan: “Ni kandeé Ndios ni danaá na noó ña kedaá xí'ín ñayuu, dá xí'i na. ⁵⁵ Sa'á ñoó, yo'ó, ña kedaá xí'ín ñayuu, dá xí'i na, ¿ndeí kua'an ion? Ta yo'ó, yáí ndii, ¿ndeí kua'an ña sa kandeéon xí'ín ndii?” ⁵⁶ Chi ion, ña kedaá xí'ín yó, dá xí'i yo, kúú kuachi kée yó. Ta ley Moisés kían dátaí kuachi yó sa'á ña yá'a yó kee yó kuachi. ⁵⁷ Tído viti ná

naki'o yó ndivé'e noo Ndios, chi ni kandeé yó xí'ín ndidaá ña yó'o sa'á ña ni kee Jesucristo, na kúú sato'o yo. ⁵⁸ Sa'á ñoó, na maní miíi, kandita toon ndó, ta kandita ndaa ndo xí'ín ña ndaa kándisa yó. Ta ndi'i ini ndo kechóon ndó choon sato'o yo Ndios, ta o sa kátuu ndó kee ndóan. Chi ná'á vá mií ndó ña choon kée yó noó na kúú sato'o yo, o naá óon ta'an vaan.

Ká'an Pablo sa'á di'ón dátaká ñayuu ñoó, dá chindeé ná na kúnda'í

16 ¹ Ta viti ko'in ka'in xí'ín ndó sa'á di'ón dátaká ndo, dá chindeé ndó na kúú ñayuu Ndios ndéi ñoo Jerusalén. Koo ini ndo kee ndó tátō'on ki'o ni sa'andai choon noó na kúú kuendá Jesús ndéi chí kuendá Galacia di'a. ² Ta iin iin kuu kasá'á sa'a semana, kánian taó xóo iin rá iin ndó noó ya'i tátō'on ki'o ni ni'i ndo noó ni kechóon ndó, ta taxi va'a ndóan. Dá kían tá ná saai noo ndéi ndó xaan, ná dá'a ni nditútí ndóan mií hora daá. ³ Dá tá ná saai noo ndéi ndó, dá ki'oi iin tuti noó ta ni ndukú mií ndó, dá tanda'í ra ko'on ra xí'ín di'ón ni nditútí ndó chindeé ndó na kúnda'í ndéi ñoo Jerusalén. ⁴ Tído tá kánian ko'on yu'u, dá kían kane'e tá'an dáó rá ko'on ra xí'ín.

Kóni Pablo ko'on na korni'ini na ñoo Corinto cháa tiempo

⁵ Saai noo ndéi ndó tá ni ndi'i ni ya'i chí kuendá Macedonia, chi Macedonia ñoo kánian ya'i. ⁶ Ndá ndi kuu koo tooi xí'ín ndó, o ndá ndi kuu kandooi kooi xí'ín ndó tein ndidaá yoó vixi, dá kuu chindeé ndó yu'u ná ko'in noo kánian ko'in. ⁷ Ko kónii ña kían chika'anda oon ni noo ndéi ndó, chi kónii kooi cháa tiempo xí'ín ndó tá ki'o dión kóni na kúú sato'o yo. ⁸ Tído koo too vai ñoo Éfeso yó'o nda ná kasandaá kuu víko Pentecostés, ⁹ dá chi ndato nda'o nóno noó kechóoin noo Ndios, ta ió iin tandeé iní ká'ano ña kua'a cháa ka ñayuu kandisa to'on Jesús, va'ará kua'á nda'o na xiní u'u ñaá.

¹⁰ Tá ni saá Timoteo noo ndéi ndó xaan, koo ini ndo keva'a ndó xí'ín xí, dá ná kadii ini xi koo xi xí'ín ndó, dá chi kéchóon xi noó na kúú sato'o yo tátō'on ki'o kéchóon mií yu'u. ¹¹ Ta ni iin ndó o sa kú'ichi ini koni ndo xí. Di'a koo ini ndo chindeé ndó xi, dá ná koo va'a ini xi nandió koó va'a xi kii xi noo iói, dá chi ió yu'u ndátii ndisaa xi xí'ín dao ka ñani yo.

¹² Ta kónii ña kandaá ini ndo sa'a ñani yo Apolos. Ni seí nda'ávii noo ná ña saá na xí'ín dao ka ñani yo kande'é ná ndo'ó. Tído ko ní xiin ta'on na saá na viti. Tído tá ni nono ná iin ka ta'ándá, dá saá na koo too na xí'ín ndó.

Xí'ín ndisá'án yó'o dándí'i Pablo ña ká'an na

¹³ Ta kaño'o ini ndo, ta kandita toon ndó xí'ín ña ndaa kándisa yó, ta cho'on taa ini ndo, ta ndakí koo ndó. ¹⁴ Ta noo ndidaá ña kée ndó, kee ndóan xí'ín ña kú'u ini ndo sa'a dao ka ñayuu.

¹⁵ Nani, sa ná'á vá ndó ña na ve'e Estéfanos ni sa kuu na mií noo ni kándisa to'on va'a sa'a Jesús noo ñayuu ndéi chí kuendá Acaya xaan. Ta ná'á ta'ani ndó ña ni nakí'o na mií ná ña chindeé ná ndidaá kúu na kúu ñayuu Ndios. ¹⁶ Ta seí nda'avíi noo ndo ña kueídó'o ndó ndidaá ka ni ñayuu kée táto'on kée na yó'o, xí'ín ndidaá ka na chindeé dao ka ñayuu, na kéchóon noo choon yó'o.

¹⁷ Ta kádii nda'o ini sa'á ña ni kasaa Estéfanos, xí'ín Fortunato, xí'ín Acaico, ta ni ndundeé iní, va'ará koó mií ndó ndéi xí'ín, ¹⁸ chí ni xi'í na tandeé iní nooí táto'on kí'o kée ta'ani na xí'ín mií ndó. Ta koo ini ndo nakoni ndo ñayuu kée táto'on kí'o kée na yó'o.

¹⁹ Ndidaá na kúu kuendá Jesús ndéi chí kuendá Asia ká'an na ndisá'án xí'ín ndó. Ta ñani yo Aquila, xí'ín kí'o yó Priscila, xí'ín ndidaá na kúu kuendá Jesús náataka dákuá'a ve'e na ká'an na ndisá'án xí'ín ndó sa'á ña kúu ndó kuendá sato'o yo Jesús. ²⁰ Ta ndidaá na kúu ñani yo ndéi yó'o ká'an na ndisá'án xí'ín ndó. Ta viti chitó tá'an ndó noo ndo, ta ña yó'o ná kakuu iin ñañó'ó ka'an tá'an ndó ndisá'án sa'á ña kúu ndó kuendá Jesús.

²¹ Ta yu'u kúu Pablo, ta táai ndisá'án yó'o kosaa noo ndo xí'ín ndá'a míí. ²² Ta tá ió iin kaa ndó ko kóni Jesucristo, na kúu sato'o yo, dá kían chi'an ná katai ndo kee Ndios. Sato'o yo Jesús, nakíi kíi ní.

²³ Ta ná koo ña maní xí'o sato'o yo Jesucristo xí'ín iin rá iin ndó. ²⁴ Kú'u ndava'o ini sa'a ndidaá ní ndó sa'á ña kúu yó kuendá Cristo Jesús. Dión ná koo.